

MESYUARAT KEDUA, PENGGAL PERTAMA  
PARLIMEN KEEMPAT BELAS  
2018

**HARI SELASA : 11 DISEMBER 2018**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG TACK [ BENTONG ]**

**TARIKH : 11 DISEMBER 2018 (SELASA)**

**SOALAN NO.1**

**Tuan Wong Tack [ Bentong ]** Minta **MENTERI AIR, TANAH DAN SUMBER ASLI** menyatakan implikasi daripada kenyataan-kenyataan bercanggah tentang sistem pengurusan hutan secara mampan yang memberikan gambaran bahawa ianya telah mengakibatkan penyahhutan dan kemerosotan hutan dari segi laporan rasmi Malaysia kepada beberapa badan Bangsa-bangsa Bersatu dan peluang untuk mendapatkan bantuan kewangan antarabangsa.

## SOALAN NO.1

### JAWAPAN:

Tuan Yang di- Pertua,

Pihak Kementerian sentiasa memberikan perhatian yang serius dalam mengeluarkan kenyataan-kenyataan rasmi dengan memberikan fakta-fakta dan statistik yang betul dan konsisten. Ianya termasuklah juga dengan kenyataan-kenyataan tentang sistem pengurusan hutan yang diamalkan di negara ini. Namun demikian, setiap kenyataan yang dikeluarkan oleh Kementerian hendaklah dilihat secara teliti dalam sudut konteks sebenar sesuatu kenyataan yang dimaksudkan.

Kemerosotan hutan umpamanya adalah satu fenomena yang berlaku bukan semata-mata disebabkan oleh pembalakan yang tidak terkawal terutamanya dalam kawasan di luar Hutan Simpanan Kekal (HSK). Ianya boleh juga berlaku dalam kawasan HSK yang diuruskan secara mampan, terutamanya kawasan HSK yang asalnya berstatus Hutan Tanah Kerajaan dan telah beberapa kali dibalak sebelum kawasan ini diwartakan atau dijadikan sebagai HSK. Dalam keadaan sebegini, kawasan-kawasan ini dikategorikan sebagai kawasan terosot dan memerlukan input pengurusan daripada pihak Kementerian atau Agensi Kerajaan untuk meningkatkan semula produktiviti kawasan tersebut melalui aktiviti penanaman pokok. Selain itu, kemerosotan hutan juga berlaku disebabkan pelbagai aktiviti lain seperti insiden kebakaran hutan dan penerokaan hutan secara haram.

Oleh yang demikian, sesuatu kenyataan atau statistik kemerosotan hutan yang dikeluarkan oleh Kementerian tidak membawa maksud

kegagalan negara dalam melaksanakan amalan pengurusan hutan di negara ini gagal.

Secara ringkasnya ingin saya tegaskan di sini bahawa pihak Kementerian mempunyai asas tertentu apabila sesuatu kenyataan dikeluarkan. Pihak Kementerian juga sentiasa bersedia memberikan penjelasan yang sewajarnya kepada pihak-pihak yang memerlukan pencerahan atas sebarang kekeliruan atau percanggahan yang mungkin timbul akibat kenyataan-kenyataan yang dikeluarkan. Pihak Kementerian juga ingin memaklumkan bahawa setakat ini, tiada implikasi negatif kepada Kerajaan yang menjejaskan permohonan negara untuk mendapatkan bantuan asing akibat daripada kenyataan-kenyataan yang telah dikeluarkan.

Sekian, terima kasih.

**MESYUARAT KEDUA, PENGGAL PERTAMA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : DATO' HAJI AHMAD NAZLAN BIN  
IDRIS [ JERANTUT ]**

**TARIKH : 11 DISEMBER 2018 (SELASA)**

**SOALAN : 2**

minta **MENTERI PEMBANGUNAN LUAR BANDAR** menyatakan pelan Kementerian di dalam membangunkan usahawan tekno dan inovasi bumiputera luar bandar agar mereka tidak tertinggal di dalam arus pasaran ekonomi yang bersifat dinamik.

**JAWAPAN**

Tuan Yang Di-Pertua,

Untuk makluman Yang Berhormat, Kementerian Pembangunan Luar Bandar (KPLB) mengutamakan segmen pembangunan usahawan sebagai salah satu daripada teras kepada pembangunan ekonomi masyarakat luar bandar yang inklusif dan mampan. Keusahawanan sentiasa menjadi aspek penting dalam perancangan program Kementerian seperti yang dinyatakan di dalam Pelan Harapan Pembangunan Luar Bandar di bawah Teras 3 : Keusahawanan iaitu Pemerkasaan usahawan luar bandar dan mewujudkan sumber pendapatan alternatif, yang telah dilancarkan pada 29 Oktober 2018 yang lalu.

Melalui Strategi Ke-4 dibawah Teras 3 : Keusahawanan ini, Kementerian sememangnya menekankan supaya wujud usahawan luar bandar yang berteraskan teknologi dan inovasi. Pelaksanaan strategi ini akan melihat kepada penambahbaikan program/projek Kementerian sedia ada serta disokong dengan pelaksanaan program/projek baharu.

Program sedia ada yang masih diteruskan pada masa sekarang adalah seperti *DesaMall@Online*, *Rural Business Challenge* (RBC), Skim Pembiayaan Usahawan Tekno dan Program *Advanced Technology Entrepreneur Development* (ADAPT). Manakala program/projek baharu yang akan direalisasikan dalam tempoh lima (5) tahun akan datang adalah seperti Program *Waste to Wealth*, Program Usahawan Pertanian Berteknologi Tinggi, Ikon Teknologi & Inovasi serta Program Usahawan Teknikal.

Disamping itu juga, dalam usaha Kementerian untuk membangunkan usahawan tekno dan inovasi bumiputera luar bandar, satu program utama telahpun diadakan oleh Kementerian pada 15 hingga 18 November yang lalu, iaitu Ekspo Inovasi & Teknologi Keusahawanan Desa (INOTEKDESA) 2018 yang telah berlangsung di MITC Ayer Keroh, Melaka dengan penyertaan seramai 344 usahawan daripada pelbagai kluster perniagaan serta pempamer.

## SOALAN NO : 2

Program yang julung kali diadakan ini bertujuan untuk mendedahkan usahawan desa kepada kemajuan inovasi dan teknologi dalam meningkatkan produktiviti perusahaan mereka.

Ia juga menjadi satu platform kepada usahawan desa untuk meninjau dengan lebih dekat pelbagai peralatan dan mesin terkini bagi meningkatkan jumlah pengeluaran selain menambahbaik kualiti produk dan perkhidmatan di kalangan usahawan desa. Pada masa yang sama, ekspo ini turut memberi peluang kepada usahawan untuk mempromosikan produk masing-masing kepada pengunjung ekspo.

Antara pengisian program INOTEKDESA ini termasuklah *pocket talks* dan padanan perniagaan (*business matching*) untuk mengadakan perbincangan secara terus bersama penyedia serta pembekal peralatan dan juga peluang sesama usahawan dalam mengembangkan perniagaan mereka.

Sebagai pelengkap sepanjang 4 hari program berlangsung, turut dipakejkan adalah *booth-booth* yang mempromosikan maklumat pembiayaan seperti Skim Pembiayaan Ekonomi Desa (SPED) dan maklumat latihan atau bengkel keusahawanan untuk masyarakat luar bandar dibawah Program Latihan Kemahiran dan Kerjaya (PLKK) yang melibatkan kursus dan latihan yang berkaitan dengan inovasi serta teknologi terkini.

## NO SOALAN : 2 (SOALAN TAMBAHAN)

**MESYUARAT KEDUA, PENGGAL PERTAMA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : TUAN SYED IBRAHIM BIN SYED NOH  
[ LEDANG]**

**TARIKH : 11 DISEMBER 2018 (SELASA)**

**SOALAN : 2 (SOALAN TAMBAHAN)**

minta **MENTERI PEMBANGUNAN LUAR BANDAR** menyatakan maklumat mengenai program INOTEKDESA terutamanya mengenai *Pocket Talk* dan *Business Matching*.

**JAWAPAN:**

Untuk makluman Yang Berhormat, Program INOTEKDESA 2018 yang telah berlangsung pada 15 hingga 18 November 2018 menyaksikan pencapaian seperti berikut:

BIL.	PERKARA	JUMLAH
1.	Bilangan Pengunjung	58,458 orang
2.	Jualan	RM904,967.70
3.	Tempahan	RM3,857,333.70
4.	Bilangan Usahawan	273 usahawan
5.	Pempamer	71 pempamer terdiri daripada pempamer Mesin, Inovasi, Persatuan/ NGO, Pembiayaan dan Penaja

Manakala bagi Aktiviti *Business Matching* (Pembekal Mesin & Usahawan) yang berlangsung pada 16 November 2018 (Jumaat) telah



menyasarkan para pembekal mesin dan usahawan dari kluster *Food & Beverages, Wellness, Lifestyle, Construction, Automotive, Agriculture, ICT & ICT Creative dan Advance Technology*. Output program yang diperolehi adalah seperti berikut:

Jumlah pembekal mesin yang hadir	14 syarikat
Jumlah usahawan yang hadir	49 syarikat
Jumlah pertemuan	157 pertemuan
Jumlah pertemuan Berjaya	43 pertemuan
Jumlah pertemuan Tidak Berjaya	21 pertemuan
Jumlah pertemuan KIV (perbincangan lanjut)	93 pertemuan
<b>NILAI JUALAN (RM)</b>	<b>RM496,000.00</b>

Seterusnya untuk aktiviti *Pocket Talks* telah diadakan pada 17 November 2018 (Sabtu) yang melibatkan 3 sesi iaitu:

<b>BIL.</b>	<b>SESI</b>	<b>TAJUK</b>
1.	<i>Pocket Talk I</i>	Kemudahan Pembiayaan Perniagaan
2.	<i>Pocket Talk II</i>	eCommerce
3.	<i>Pocket Talk III</i>	Menerokai Pasaran & Program Sokongan Eksport oleh MATRADE

*Pocket Talks* ini bertujuan untuk menyampaikan maklumat-maklumat mengenai kemudahan pembiayaan perniagaan yang ditawarkan oleh agensi kerajaan serta platform perniagaan secara e-dagang seperti lazada, instaweb, shopee, 11<sup>th</sup> street dan mempromosikan eksport Malaysia bagi membolehkan syarikat-syarikat tempatan mengukir sempadan baru di pasaran global dengan program sokongan eksport. Seramai 73 usahawan terutamanya yang berada di Zon Selatan telah hadir untuk tiga sesi *Pocket Talks* tersebut.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : PUAN JUNE LEOW HSIAD HUI [HULU SELANGOR]**  
**TARIKH : 11 DISEMBER 2018 (SELASA)**

**SOALAN NO. 3**

Minta **MENTERI BELIA DAN SUKAN** menyatakan apakah program yang ada pada masa ini untuk memupuk kebolehan atlet dan juga pelan/rancangan Kementerian untuk memajukan pembangunan sukan negara.

**JAWAPAN**

Yang di-Pertua,

1. Untuk makluman Ahli Yang Berhormat, Negara kita telah berjaya melahirkan atlet-atlet bertaraf dunia. Antaranya Dato Lee Chong Wei bagi sukan badminton, Pandelega Rinong dari sukan akuatik terjun yang merupakan pemenang Pingat Perak di Olimpik Rio Brazil 2016 dan pingat gangsa di Olimpik London 2012. Cheong Jun Hoong juga daripada sukan akuatik terjun yang merupakan juara dunia Kejohanan Akuatik Dunia Budapest 2017. Pelumba trek berbasikal negara Mohd Azizulhasni Awang merupakan pemenang pingat gangsa Sukan Olimpik Rio de Janeiro 2016, pingat emas dalam Kejohanan Dunia Berbasikal Trek UCI 2017 Hong Kong, pingat emas di kejohanan Piala Trek China 2018 di Taiyuan, China dan yang terbaru di Sukan Asia Jakarta 2018 juga pingat emas dalam acara pecut.

2. Kumpulan atlet remaja juga telah menunjukkan prestasi yang cemerlang di temasya-temasya sukan remaja seperti Sukan Olimpik Remaja ( YOG ), Sukan Remaja Asia ( AYG ) dan Sukan Remaja Komanwel ( CYG ) malahan di temasya sukan utama yang lain seperti Sukan SEA. Ratu terjun negara, Pandelesa Rinong adalah merupakan pemenang pingat perak semasa temasya Sukan Olimpik Remaja 2010 di Singapura dan juga pemenang pingat emas yang pertama dalam sukan terjun di temasya Sukan Komanwel di New Delhi pada tahun yang sama. Pada tahun 2012 di temasya Sukan Olimpik London, beliau telah dinobatkan sebagai pemenang pingat wanita yang pertama di temasya Olimpik setelah beliau berjaya memungut pingat gangsa. Terbaru, pemain wanita muda badminton negara yang berusia 18 tahun, Goh Jin Wei, berjaya memenangi pingat emas pertama negara dalam acara perseorangan individu wanita serta pasukan hoki remaja lelaki negara juga berjaya memperolehi pingat emas ke-2 negara di Temasya Sukan Remaja Olimpik 2018 di Buenos Aires, Argentina.

3. Bagi memastikan kesinambungan kecemerlangan atlet di persada dunia ini, program-program latihan yang sedang dilaksanakan oleh MSN dengan kerjasama Persatuan Sukan Kebangsaan (PSK) serta beberapa pemegang taruh utama seperti Kementerian Pendidikan Malaysia (KPM) dan Majlis Sukan Negeri perlu diteruskan malah diperhebatkan. Program latihan khusus ke arah temasya-temasya sukan seperti Sukan SEA, Sukan Asia, Sukan Komanwel dan Sukan Olimpik dilaksanakan dengan memberikan penekanan kepada beberapa aspek utama seperti pendedahan latihan dan pertandingan di peringkat antarabangsa, kepakaran jurulatih, perkhidmatan sokongan sains serta perubatan sukan. Di samping itu juga, pakej latihan atlet yang lebih menarik juga perlu bagi memastikan atlet-atlet ini akan terus berusaha meningkatkan prestasi semasa mereka dan seterusnya menyumbang kepada kecemerlangan di peringkat antarabangsa.

4. Antara program latihan yang dilaksanakan adalah seperti berikut:-

<b>Program</b>	<b>Kumpulan Atlet dan Tumpuan Sukan</b>
<b><i>Podium</i></b>	- Senior Atlet Elit - Fokus kepada Sukan Asia, Sukan Komanwel dan Sukan Olimpik
<b><i>Kita Juara</i></b>	- Senior Atlet - Tumpuan kepada 19 jenis sukan. - Persediaan ke Sukan SEA
<b><i>Pelapis</i></b> i) Pelapis Kebangsaan ii) Pelapis Serantau iii) Pelapis Negeri	- Atlet Remaja (bawah 21 tahun) - Tumpuan kepada 14 jenis sukan (15 disiplin) - Persediaan Temasya Sukan Malaysia (SUKMA), Sukan Remaja Kebangsaan atau Kejohanan Sukan Remaja Peringkat Asia/Komanwel/Olimpik
<b><i>Sukan Pilihan</i></b>	- Atlet muda (bawah 15 tahun) - Tumpuan kepada 6 jenis sukan - Persediaan untuk Karnival Bakat, Kejohanan Remaja Peringkat Umur
<b><i>Bakat</i></b> -Program <i>Talent Identification</i>	- Atlet muda (7 - 15 tahun) - Tumpuan kepada 7 jenis sukan - Persediaan untuk Karnival Bakat, Kejohanan Remaja Kebangsaan.

5. Pihak Kementerian turut menyediakan kemudahan-kemudahan latihan yang bertaraf dunia seperti Velodrom Nasional Nilai, Pusat Kecemerlangan Paralimpik Kampung Pandan, Akademi Bola Sepak Negara Mokhtar Dahari, Gambang dan Akademi Badminton Malaysia, Bukit Kiara. Dengan adanya kemudahan-kemudahan sukan seperti ini, atlet –atlet akan dapat menjalani latihan dengan lebih selesa serta kompetitif dan seterusnya membantu meningkatkan prestasi mereka.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : DATUK ZAKARIA BIN MOHD EDRIS @**  
**TUBAU [ LIBARAN ]**  
**TARIKH : 11 DISEMBER 2018 (SELASA)**

**SOALAN NO. 4**

Minta **MENTERI KESIHATAN** menyatakan cadangan untuk menaik taraf hospital-hospital Kerajaan di seluruh negara, dengan tumpuan di Sabah dan Sarawak, yang masih ketinggalan kemudahannya berbanding di Semenanjung.

**JAWAPAN**

**Yang di-Pertua,**

Kementerian Kesihatan Malaysia (KKM) sentiasa berusaha untuk meningkatkan prasarana kesihatan di seluruh negara terutamanya hospital-hospital Kerajaan. Peningkatan ini lazimnya dilakukan melalui pembinaan hospital-hospital baru atau projek menaiktaraf hospital-hospital yang ada berdasarkan keperluan semasa.

Faktor-faktor yang diambil kira dalam menentukan keperluan dan kesesuaian sesebuah hospital untuk dinaik taraf adalah tahap keselamatan atau kestabilan struktur yang mendesak, keadaan bangunan dan peralatan lama serta usang, peningkatan beban penyakit, peningkatan jumlah penduduk, keperluan peningkatan akses kepada perkhidmatan pesakit dalam dan pertambahan skop perkhidmatan di hospital tersebut.

Di bawah Rancangan Malaysia Kesebelas (RMKe-11), Kerajaan telah meluluskan **46 projek** dengan kos sebanyak **RM4,233,038,012** yang berkaitan dengan menaiktaraf kemudahan di hospital-hospital kerajaan di seluruh negara. Bagi tahun 2016 sebanyak 30 projek diluluskan, manakala 1 projek diluluskan pada tahun 2017, serta 15 projek pada tahun 2018.

Untuk makluman Tuan Yang di-Pertua, daripada **46 projek** tersebut sebanyak **6 projek dengan kos sebanyak RM312,106,297** adalah **diluluskan di negeri Sabah** dan **6 projek dengan kos projek sebanyak RM357,997,400** diluluskan di negeri Sarawak.

Untuk negeri **Sabah**, projek-projek naiktaraf yang dirancang atau sedang berjalan termasuklah:

- i. Naiktaraf Hospital Tawau (2 projek);
- ii. Naiktaraf Hospital Papar;
- iii. Naiktaraf Hospital Duchess Of Kent, Sandakan;

## NO SOALAN: 4

- iv. Naiktaraf Hospital Kudat; dan
- v. Naiktaraf Hospital Kota Marudu.

Bagi negeri **Sarawak** pula, projek-projek naiktaraf yang dirancang atau sedang berjalan adalah:

- i. Naiktaraf Hospital Umum Sarawak (2 projek);
- ii. Naiktaraf Hospital Sibui;
- iii. Naiktaraf Hospital Miri;
- iv. Naiktaraf Hospital Limbang; dan
- v. Naiktaraf Hospital Sentosa.

KKM juga sentiasa mengambil berat tentang keperluan kelengkapan peranti perubatan hospital termasuk di negeri Sabah dan Sarawak. Antara 2014 hingga 2018, peruntukan sebanyak **RM256.5 juta** telah diagihkan ke hospital-hospital di Negeri Sabah dan Sarawak untuk perolehan peralatan perubatan bagi tujuan penggantian aset perubatan lama mahupun perolehan peralatan perubatan baru.

Berikut adalah pecahan peruntukan bagi peralatan perubatan yang bagi tahun 2014 hingga 2018:

- i) Tahun 2014 - RM53,521,027;
- ii) Tahun 2015 - RM134,966,144;
- iii) Tahun 2016 - RM51,874,524;
- iv) Tahun 2017 - RM1,748,635; dan
- v) Tahun 2018 - RM14,351,489.

Kementerian Kesihatan Malaysia sentiasa mengambil berat berkaitan keperluan menaiktaraf kemudahan fasiliti kesihatan terutamanya hospital awam di seluruh negara. Kementerian juga komited untuk menyediakan perkhidmatan yang saksama tanpa mengira sempadan negeri dalam menyediakan perkhidmatan kesihatan kepada semua warga Malaysia.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN WONG SHU QI [ KLUANG ]**

**TARIKH : 11 DISEMBER 2018 (SELASA)**

**SOALAN NO. 5**

minta **MENTERI PENDIDIKAN** menyatakan langkah-langkah untuk menggalakkan lebih ramai guru berkhidmat di luar bandar atau kawasan pedalaman di Sabah dan Sarawak memandangkan statistik guru yang mohon tukar balik ke Semenanjung terlalu tinggi.



**JAWAPAN**

Yang di-Pertua,

Kementerian Pendidikan Malaysia (KPM) menyedari trend permohonan pertukaran guru dari Sabah dan Sarawak ke Semenanjung. Bagi sesi Januari 2019, seramai 5,230 guru meliputi 2,038 guru sekolah menengah dan 3,192 guru sekolah rendah yang memohon pertukaran.

Pada dasarnya KPM menggalakkan lebih ramai guru untuk berkhidmat di luar bandar atau kawasan pedalaman di Sabah dan Sarawak. Ini merupakan jasa dan bakti mereka kepada negara. Penempatan guru baharu dan guru kelahiran tempatan diberi keutamaan untuk berkhidmat di kawasan luar bandar dan pedalaman sekurang-kurangnya tiga (3) tahun. Selain daripada itu, guru di bawah KPM yang berkhidmat di kawasan pedalaman menikmati beberapa keistimewaan seperti berikut:

1. Elaun Khas Mengikut Lokasi dan Tahap Kesusahan (EKMLTK) atau Bayaran Insentif Pedalaman yang juga dikenali sebagai BIP. Insentif ini adalah bertujuan untuk menampung hidup susah di pedalaman;
2. Bayaran Insentif Tetap Perumahan (ITP) sepenuhnya sekiranya menduduki rumah yang tidak memenuhi kriteria rumah Kerajaan. Keistimewaan ini adalah bagi menampung kekurangan kemudahan perumahan yang diberi.
3. Elaun Balik Kampung setahun sekali;
4. Elaun/insentif yang diterima oleh guru-guru Semenanjung Malaysia yang berkhidmat di Sabah dan Sarawak iaitu:
  - a. Elaun Perumahan Wilayah bagi guru yang tidak tinggal di rumah Kerajaan.
  - b. Bayaran Insentif Wilayah menggantikan Bantuan Sara Hidup (COLA).
  - c. Tambang mengunjungi wilayah asal bagi guru dan keluarga setahun sekali.
  - d. Tambang ehsan bagi guru menziarahi ibu bapa kandung dan mertua yang sakit tenat atau meninggal dunia.

## SOALAN NO: 5

- e. Elaun gangguan sebulan gaji hakiki terakhir bagi pegawai yang bertukar balik ke wilayah asal.

Pemberian insentif ini bertujuan menggalakkan guru-guru berkhidmat di kawasan pedalaman. Insentif ini juga dapat menarik minat dan seterusnya mengekalkan guru-guru untuk terus berkhidmat di sekolah-sekolah di kawasan pedalaman. Dengan langkah ini, sekolah di kawasan pedalaman akan mempunyai tenaga guru yang terlatih yang mencukupi, berkualiti dan mengikut opsyen untuk melaksanakan proses pengajaran dan pembelajaran di sekolah.

Walau bagaimanapun, tugas pendidik adalah tugas yang sangat mulia. Mereka adalah pejuang sebenar yang menabur bakti dalam memajukan minda dan melahirkan insan-insan berjaya dalam persada pendidikan negara. Insentif yang diterima oleh guru adalah pelengkap kepada titik peluh dalam perjuangan di kawasan pedalaman secara berterusan. Saya mengucapkan jutaan tahniah dan terima kasih yang tidak terhingga kepada semua pendidik terutamanya yang berkhidmat di kawasan luar bandar dan pedalaman.

Saya juga yakin bahawa sentimen ini dikongsi oleh ramai anggota masyarakat kita. Guru-guru yang mengajar di pedalaman lantas berjauhan daripada keluarga dan sanak saudara, mereka inilah adiwira yang sebenar atau pun 'superheroes.' Sekali lagi, jutaan tahniah kita ucapkan kepada mereka.

Sekian, terima kasih

RJM162

**PEMBERITAHUAN PERTANYAAN**

**PERTANYAAN : LISAN**  
**DARIPADA : DATO' SRI IKMAL HISHAM BIN ABDUL**  
**AZIZ (TANAH MERAH)**  
**TARIKH : 11 DISEMBER 2018**

**SOALAN**

**Dato' Sri Ikmal Hisham Bin Abdul Aziz [ Tanah Merah ] minta KEMENTERIAN PERDAGANGAN ANTARABANGSA DAN INDUSTRI menyatakan sejak 10 Mei 2018 berapakah jumlah pelabur asing yang menarik keluar pelaburan mereka di negara ini dan berapakah nilainya.**

**JAWAPAN**

Tuan Yang di-Pertua,

Bagi tempoh Mei hingga September 2018, sebanyak lima syarikat perkilangan yang melibatkan penyertaan pelabur asing telah menutup operasi mereka sepenuhnya. Penutupan operasi bagi kelima-lima syarikat ini melibatkan pelaburan keseluruhan sebanyak RM308.7 juta..

Keputusan penutupan syarikat-syarikat ini adalah lebih menjurus kepada keputusan perniagaan dan bukannya kerana faktor peralihan Kerajaan. Antara faktor yang menyebabkan pelabur asing menarik keluar pelaburan mereka dari Malaysia termasuklah:

- (i) penguncupan ekonomi global, ketidaktentuan pasaran berikutan penurunan dalam permintaan dan jualan, peningkatan kos operasi serta ketiadaan permintaan produk menyebabkan para pelabur terpaksa menstruktur semula syarikat serta strategi perniagaan mereka hingga ada yang mengambil keputusan untuk menarik keluar pelaburan mereka di luar negara termasuk di Malaysia;

## SOALAN NO : 6

- (ii) pendekatan Malaysia memberi tumpuan kepada pelaburan-pelaburan berkualiti dan berteknologi tinggi serta peralihan teknologi ke arah digitalisasi dan Industri 4.0 serta peningkatan kos buruh di Malaysia menyebabkan pelabur-pelabur, terutamanya dalam projek berintensifkan buruh tidak dapat menyesuaikan operasi syarikat dengan perubahan-perubahan ini mengalami kesukaran untuk terus beroperasi dan mengekalkan keuntungan jangka masa panjang di negara ini; dan
- (iii) peningkatan kos buruh di Malaysia di mana sebahagian pelabur asing terutamanya yang membabitkan industri-industri yang berintensifkan buruh bertindak menarik keluar pelaburan mereka di Malaysia.

Tuan Yang di-Pertua,

Penutupan syarikat-syarikat tersebut telah melibatkan seramai 362 orang pekerja tempatan diberhentikan. Walau bagaimanapun, kesemua syarikat yang telah menutup operasi ini juga telah mengambil langkah-langkah berikut:

- (i) bekerjasama dengan Persatuan Pekilang-Pekilang Malaysia (*Federation of Malaysian Manufacturers - FMM*) dan syarikat-syarikat lain bagi menyediakan penempatan semula bagi pekerja yang akan diberhentikan;
- (ii) bekerjasama dengan Pembangunan Sumber Manusia Berhad (*Human Resources Development Fund - HRDF*) bagi membantu pekerja yang akan diberhentikan untuk menyertai program latihan kemahiran yang sesuai melalui *HRDF Outplacement Centre*. Di bawah skim ini, pekerja tempatan yang telah diberhentikan kerja akan dilengkapi dengan kemahiran industri tambahan atau kelayakan yang diperlukan bagi membolehkan mereka bekerja semula atau bekerja sendiri (*self employed*); dan
- (iii) menawarkan pakej pampasan yang sewajarnya kepada pekerja yang terbabit. Sekian, terima kasih.

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : PUAN RUSNAH BINTI ALUAI  
[ TANGGA BATU ]**

**TARIKH : 11 DISEMBER 2018**

**SOALAN : 7**

**Puan Rusnah binti Aluai [ Tangga Batu ]** minta **PERDANA MENTERI** menyatakan berapakah kakitangan Majlis Profesor Negara yang telah diberhentikan selepas penukaran kerajaan ekoran daripada Pilihan Raya Umum Ke-14, dan adakah Kerajaan sedang atau telah membantu kakitangan yang telah diberhentikan itu supaya memulakan kehidupan baru dengan pekerjaan baru.

SULIT

JAWAPAN: **YB TUAN MOHAMED HANIPA BIN MAIDIN**

**TIMBALAN MENTERI DI JABATAN PERDANA  
MENTERI**

Tuan Yang Di Pertua,

Majlis Profesor Negara (MPN) merupakan Syarikat Berhad dengan Jaminan atau *Company Limited By Guarantee* (CLBG) yang diletakkan di bawah JPM serta menerima dana daripada kerajaan. Kakitangan MPN bukanlah penjawat awam. Sebaliknya, mereka adalah di bawah lantikan MPN.

Berdasarkan rekod, seramai 28 orang pegawai MPN telah ditamatkan perkhidmatan pada 15 November 2018 dengan notis penamatan perkhidmatan bermula pada 1 November 2018 berakhir 30 November 2018. Pegawai turut dijanjikan pampasan sebanyak 3 bulan gaji.

Kerajaan pada 2 November 2018 telah bersetuju dengan pewujudkan semula MPN dengan nama, struktur dan keahlian baharu yang dipilih berdasarkan merit, kelayakan serta bebas daripada campur tangan politik dan diletakkan di bawah Kementerian Pendidikan.

Adalah dicadangkan, Kementerian Sumber Manusia (KSM) membantu pegawai-pegawai yang terlibat dalam memberi khidmat nasihat bagi mencari pekerjaan yang sesuai di kalangan majikan yang berdaftar di bawah KSM sama ada syarikat swasta atau syarikat milik kerajaan.

Sekian terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : TUAN HAJI AWANG BIN HASHIM**  
**[PENDANG]**  
**TARIKH : 11 DISEMBER 2018 (SELASA)**

**SOALAN NO. 8**

Minta **MENTERI KESIHATAN** menyatakan apakah syarat-syarat yang diperlukan oleh seseorang doktor swasta untuk memperbaharui Sijil Amalan Tahunan (*Annual Practising Certificate*).

**JAWAPAN**

**Yang di-Pertua,**

Mana-mana pengamal perubatan yang hendak mengamal perubatan hendaklah berdaftar terlebih dahulu dengan Majlis Perubatan Malaysia (MPM). Keperluan ini termaktub di bawah Akta Perubatan Malaysia 1971.

Berdasarkan laluan kerjaya seseorang pengamal perubatan, setelah bergraduan beliau perlu berdaftar sementara terlebih dahulu dengan MPM bagi membolehkannya melalui latihan pengamal perubatan siswazah (*housemanship*). Pendaftaran Sementara ini membenarkan pengamal perubatan untuk mengamal perubatan di bawah seliaan (*supervision*) sahaja di hospital-hospital latihan siswazah yang diwartakan. Setelah melalui latihan siswazah dengan jayanya beliau seterusnya layak untuk berdaftar penuh. Pendaftaran Penuh ini mengiktiraf bahawa seseorang pengamal perubatan itu layak untuk mengamal berdasarkan pengalaman dan latihan yang telah dilaluinya.

## NO SOALAN: 8

Apabila pengamal perubatan berdaftar penuh, beliau akan layak untuk memohon Perakuan Amalan Tahunan (*Annual Practicing Certificate, APC*). APC ini merupakan lesen untuk pengamal perubatan mengamalkan perubatan di Malaysia dan ia perlu diperbaharui setiap tahun. Sehubungan itu, untuk seseorang pengamal perubatan swasta memperbaharui APC beliau, pengamal perubatan tersebut perlu telah berdaftar penuh terlebih dahulu.

Syarat terkini untuk pengamal perubatan (kerajaan/swasta) adalah seperti berikut:

- i. Mempunyai 20 mata CPD yang dikira bermula pada 1 julai sehingga 30 jun pada tahun sebelum permohonan. (APC pada tahun 2020)
- ii. Mempunyai Medical Indemnity Insurance
- iii. Bebas dari sebarang kes disiplin MPM
  - a. Etika
  - b. Medical review panel/ Fitness to practice

Terdapat Jawatan Kuasa (JKP) yang akan membuat penilaian sekiranya ada permohonan dari pengamal perubatan dan mereka telah terputus amalan pada jangka masa yang lama atau mempunyai masalah disiplin sebelum itu.

Berdasarkan rekod pada tahun 2018, terdapat 14,617 pengamal perubatan swasta daripada jumlah keseluruhan pengamal perubatan sebanyak 48,002.

Pengamal perubatan boleh memohon pembaharuan APC dengan memuat turun dan mengisi borang daripada laman web MPM, [www.mmc.gov.my](http://www.mmc.gov.my). MPM turut menyediakan kemudahan pembaharuan APC secara *online* yang boleh dicapai melalui laman web yang sama. Adalah dinasihatkan para pengamal perubatan agar memohon pembaharuan dengan cara ini kerana ia lebih senang dan cepat.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KARUPAIYA A/L MUTUSAMI  
[PADANG SERAI]**

**TARIKH : 11 DISEMBER 2018 (SELASA)**

**SOALAN NO. 9**

minta **MENTERI PENDIDIKAN** menyatakan apakah tindakan yang diambil oleh Kementerian mengenai keadaan sistem pembentungan di kebanyakan sekolah Tamil yang sangat teruk serta langkah Kementerian untuk menggabungkan sekolah-sekolah Tamil di pedalaman agar dipindahkan ke kawasan yang lebih baik.

**JAWAPAN**

Yang di-Pertua,

Kementerian Pendidikan Malaysia (KPM) menyalurkan peruntukan penyelenggaraan di sekolah jenis kebangsaan Tamil (SJKT) berstatus sekolah kerajaan secara berperingkat-peringkat berdasarkan tahap keutamaan dan syor daripada Jabatan Pendidikan Negeri (JPN) dan jabatan-jabatan teknikal. Peruntukan yang disalurkan bagi pembaikan sistem kumbahan dan pembentungan di SJKT berstatus sekolah kerajaan adalah berjumlah RM79,850.00 pada tahun 2017 dan RM20,000.00 pada tahun 2018.

Untuk makluman Ahli Yang Berhormat, berdasarkan data 31 Ogos 2018 terdapat 360 buah SJKT dalam kategori sekolah kurang murid (SKM). Kebanyakan SJKT ini berada di dalam kawasan ladang dan beroperasi di atas tapak hak milik ladang.

Di dalam meningkatkan kualiti infrastruktur khususnya pembaikan sistem kumbahan dan pembentungan di SJKT, rasionalisasi SJKT yang dikategorikan sebagai sekolah kurang murid (SKM) akan sentiasa dikaji secara berterusan oleh KPM agar SJKT mampu memberikan pendidikan yang mampan kepada murid-muridnya.

Sekian, terima kasih.

RJM161

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJI SHABUDIN BIN YAHAYA  
[TASEK GELUGOR ]**

**TARIKH : 11 DISEMBER 2018 (SELASA)**

**SOALAN NO. 10**

Minta **MENTERI BELIA DAN SUKAN** menyatakan perancangan jangka masa panjang kementerian dalam mengurangkan jumlah pengangguran belia serta apakah usaha yang telah dijalankan oleh Kementerian bagi menyelesaikan permasalahan tersebut.

**JAWAPAN**

Yang di-Pertua,

1. Kementerian Belia dan Sukan melalui Institut Penyelidikan Pembangunan Belia Malaysia (IYRES) telah melaksanakan kajian bertajuk “**Youth Unemployment Profiling & Employability Competencies**” pada tahun 2016 bagi mewujudkan profil belia menganggur dan membangunkan alat pengukuran bagi kompetensi kebolehpasaran belia serta mengenalpasti kecenderungan belia terhadap pekerjaan 3D (*Dirty, Dangerous, Difficult*).
2. Hasil kajian menunjukkan bahawa majoriti (58.3%) responden dalam kalangan belia yang menganggur adalah berumur 20 hingga 24 tahun. Selebihnya (34.8%) belia menganggur adalah mereka

yang berumur 25 hingga 30 tahun. Selain itu, kemahiran berbahasa Inggeris serta kemahiran keusahawanan berada di tahap sederhana dari segi kebolehpasaran kompetensi belia. Terdapat lima (5) faktor utama belia menganggur iaitu permohonan kerja yang tidak berjaya (61%), masih menunggu tawaran kerja (11.8%), memilih pekerjaan (5%), baru menghabiskan pelajaran dan ingin berehat (4.4%) serta belia yang ingin melanjutkan pelajaran ke peringkat lebih tinggi (4.4%).

3. Berdasarkan kepada dapatan dan rumusan kajian **“Youth Unemployment Profiling & Employability Competencies”** pada tahun 2016, terdapat beberapa langkah strategik bagi mengatasi pengangguran di kalangan belia iaitu :-
- a. Melaksanakan program pembangunan belia yang lebih bersepadu merangkumi kemahiran berasaskan pembangunan kerjaya;
  - b. Memberi penekanan khusus berkenaan Bahasa Inggeris kepada semua program belia yang dianjurkan oleh Kementerian termasuk penerapan kepada pelajar Institusi Latihan Kemahiran Belia dan Sukan (ILKBS);
  - c. Memperbanyakkan program belia berunsurkan keusahawanan untuk ditawarkan kepada belia yang tidak berminat dalam bidang pelajaran seperti Program Youth Career (Y-Career);
  - d. Meningkatkan fleksibiliti pendidikan vokasional melalui penyediaan program jangka pendek kepada belia seperti Bootcamp 2018;
  - e. Melaksanakan kerjasama antara pemegang taruh yang berkepentingan (Key Stakeholders) dan Kementerian dengan lebih berkesan dalam melaksanakan perkongsian data dan program pekerjaan yang lebih berfokus seperti implementasi

portal Youth Enterprenuer Network (YEN) yang menjadi medium untuk memperoleh maklumat pinjaman perniagaan serta bidang latihan yang berkaitan usahawan yang ditawarkan; dan

- f. Melaksanakan program kerjaya dengan memfokuskan kumpulan sasaran kepada golongan belia terpinggir (*marginalized youth*) seperti Program Keusahawanan Belia Bestari (B-Bestari).
8. Selaras dengan aspirasi Kerajaan, Kementerian Pembangunan Usahawan (MED) dan Kementerian Belia dan Sukan (KBS) telah bersama-sama menganjur Sesi Dialog dengan tema “Pembudayaan dan Pemerkasaan Keusahawanan Anak Muda” yang berlangsung di *Malaysia Global Innovation & Creativity Centre (MaGIC)*, Cyberjaya pada 25 September 2018. Program ini telah dihadiri oleh lebih 600 usahawan anak muda dari pelbagai segmen dan kelompok di akar umbi.
  9. Hasil dari sesi dialog tersebut pelbagai cadangan dan pandangan yang telah dikemukakan mengikut skop seperti:
    - i. Penglibatan Usahawan Belia dan OKU;
    - ii. Ekosistem Pendidikan dan Latihan Yang Mampan;
    - iii. Kajian/ Semakan Semula Dasar Berkaitan;
    - iv. Lokasi, Infrastruktur dan Sistem Sokongan;
    - v. One Stop Centre bagi Pembudayaan dan Pemerkasaan Usahawan Belia; dan
    - vi. Penjenamaan Semula Program Made In Malaysia
  10. Kementerian Pembangunan Usahawan (MED) dan Kementerian Belia dan Sukan (KBS) sedang mengambil tindakan susulan seperti:

- i. Memperhalusi dan merasionalisasi input untuk merangka hala tuju keusahawanan anak muda negara dan menambahbaik dasar/ program sedia ada;
  - ii. Cadangan-cadangan pelaksanaan program di bawah Dana Pemerkasaan dan Keusahawanan Anak Muda; dan
  - iii. Menyusul isu-isu berkaitan dengan Kementerian/ Jabatan/ Agensi lain dan Kerajaan Negeri berkenaan isu-isu yang bersifat *cross cutting*.
10. Kementerian Belia dan Sukan (KBS) melalui Cawangan Pembangunan Ekonomi, Jabatan Belia dan Sukan Negara (JBSN) berperanan menyedia dan menyelaras program-program membudayakan keusahawanan kepada golongan anak muda sepertimana yang telah digariskan di dalam Dasar Belia Malaysia (DBM). Pihak KBS telah melaksanakan program-program Pembangunan Usahawan Muda yang bertujuan menerapkan budaya berniaga dengan memberi pendedahan, kesedaran dan pengetahuan. KBS turut bekerjasama dengan agensi-agensi lain yang terlibat dalam menjayakan usaha ini menerusi khidmat bimbingan dan nasihat di peringkat awal.
11. Selain itu, Kementerian juga mewujudkan Pusat Sehati Maya menerusi Portal YEN (*Youth Entrepreneurial Networking*) yang bertindak sebagai medium bagi usahawan-usahawan muda mendapatkan kemudahan latihan dan dana pembiayaan dalam memulakan perniagaan. Agensi yang menjadi rakan strategik di dalam portal ini, antaranya adalah Majlis Amanah Raya (MAR), Perbadanan Usahawan Nasional Berhad (PUNB) dan Tabung Ekonomi Kumpulan Usaha Niaga (TEKUN Nasional).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NOOR AMIN BIN AHMAD [ KANGAR ]**

**TARIKH : 11 DISEMBER 2018 (SELASA)**

**SOALAN NO. 11**

minta **MENTERI PENDIDIKAN** menyatakan secara terperinci jumlah sekolah daif di setiap negeri.

**JAWAPAN**

Yang di-Pertua,

Untuk makluman Ahli Yang Berhormat, Kementerian Pendidikan Malaysia komited untuk menangani isu sekolah daif di seluruh negara. Pada masa ini, jumlah keseluruhan sekolah daif adalah sebanyak 1488 buah sekolah iaitu 420 sekolah menengah dan 1068 sekolah rendah. Bilangan sekolah daif di negeri Perlis ialah 10 buah sekolah, Kedah 97 buah, Pulau Pinang 25 buah, Perak 202 buah, Selangor 153 buah, Wilayah Persekutuan Kuala Lumpur 35 buah, Negeri Sembilan 47 buah, Melaka 52 buah, Johor 194 buah, Pahang 135 buah, Terengganu 45 buah, Kelantan 37 buah, Sarawak 201 buah, Sabah 251 buah, dan Wilayah Persekutuan Labuan 4 buah sekolah.

Sekian, terima kasih

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : LISAN**

**DARIPADA : DATO' SERI TIONG KING SING [BINTULU]**

**TARIKH : 11 DISEMBER 2018 (SELASA)**

**Dato' Seri Tiong King Sing [Bintulu] minta MENTERI  
PERDAGANGAN DALAM NEGERI DAN HAL EHWAL PENGGUNA  
menyatakan :-**

- a) Bagaimana pihak Kementerian dapat melaksanakan pemantauan dan pengawalan harga barang asas (GMT) supaya tidak berlaku ketirisan pada harga dan bekalan bahan mentah terutamanya di kawasan luar bandar.
- b) Sejauh manakah keberkesanan pelaksanaan Cukai Jualan dan Perkhidmatan (SST) dapat meningkatkan pendapatan negara dan pada masa yang sama dapat mengurangkan kos sara hidup rakyat.



**JAWAPAN:**

**Tuan Yang di-Pertua,**

Kementerian Perdagangan Dalam Negeri dan Hal Ehwal Pengguna (KPDNHEP) telah mengambil beberapa langkah tertentu bagi memastikan tidak berlaku kenaikan harga dan ketirisan bekalan terutamanya melibatkan gula, minyak masak dan tepung gandum (GMT) terutamanya di kawasan luar bandar. Diantara langkah yang diambil adalah seperti berikut:

- i) Melakukan pemeriksaan secara berkala di kawasan luar bandar dan bagi bulan Januari sehingga Ogos 2018 sebanyak 70,653 pemeriksaan telah dilakukan bagi memastikan peniaga-peniaga mematuhi setiap peruntukan undang-undang yang telah ditetapkan;
- ii) Mengadakan pertemuan dengan pengilang GMT secara berkala bagi memastikan harga dan bekalan di luar bandar terkawal serta tiada berlaku kenaikan harga dan isu bekalan;
- iii) Kerjasama bersama-sama agensi-agensi lain seperti SPRM, Kastam, Unit Pencegahan Penyeludupan (UPP), Polis DiRaja Malaysia bagi memastikan isu ketirisan dan penyelewengan GMT dapat dibendung; dan
- iv) Mengenakan tindakan tegas kepada mana-mana kilang, peniaga dan mana-mana orang yang melakukan kesalahan di bawah Akta Kawalan Bekalan 1961 yang melakukan aktiviti penyelewengan terhadap GMT. Pada tahun 2018 iaitu antara Januari sehingga Ogos sebanyak 64 kes telah diambil dengan nilai rampasan berjumlah RM 681,921.00

**Tuan Yang di-Pertua,**

KPDNHEP telah melaksanakan Program Penyeragaman Harga di kawasan luar bandar bertujuan memastikan pengguna di kawasan luar bandar dapat menikmati harga barangan perlu sama dengan kawasan di bandar dan juga memastikan bekalan mencukupi. Program ini telah bermula pada tahun 2009 dan Kerajaan akan menanggung kos pengangkutan tujuh (7) barangan bersubsidi/ kawalan yang akan dibekalkan oleh pembekal ke kawasan-kawasan pedalaman yang terpilih. Di dalam Buku Bajet bagi tahun 2019, Kerajaan Pakatan Harapan telah memperuntukkan sebanyak RM 150 juta berbanding tahun ini iaitu sebanyak RM 80 juta bagi memastikan kebajikan rakyat di luar bandar tidak dipinggirkan terutamanya di kawasan pedalaman Sabah dan Sarawak.

Bagi memastikan program tersebut tidak berlaku penyelewengan dan dapat dinikmati oleh pengguna di kawasan luar bandar, KPDNHEP akan melakukan naziran dan audit secara berkala ke atas syarikat-syarikat yang mengangkut barangan tersebut dan memastikan barangan sampai kepada pengguna di kawasan luar bandar.

**Tuan Yang di-Pertua,**

Bagi menjawab pertanyaan Yang Berhormat Bintulu berkenaan keberkesanan pelaksanaan SST dalam mengurangkan kos sara hidup rakyat, suka saya ingin menyatakan di dalam dewan yang mulia ini bahawa jika ingin dinilai impak SST terhadap harga barangan dan kos sara hidup rakyat adalah jauh lebih rendah berbanding GST. Cukai Jualan dan Perkhidmatan (SST) hanyalah merangkumi 38% daripada bakul barangan CPI (Indeks Harga Pengguna) manakala bagi GST pula merangkumi 60% daripada bakul barangan CPI tersebut. Senarai barangan yang dikecualikan bagi SST juga adalah 10 kali ganda lebih tinggi daripada GST yang hanya memperuntukkan sebanyak 545 barangan.

Melalui pelaksanaan SST yang telah ditambah baik ini juga Kerajaan Pakatan Harapan telah mengembalikan semula jumlah kutipan cukai

## NO. SOALAN: 12

sekitar RM 23 Billion kerana kami amat komited dan prihatin terhadap kekusaran rakyat yang terkesan akibat kos sara hidup yang tinggi.

Berdasarkan kepada kajian kesan pelaksanaan SST yang dilaksanakan oleh pihak kementerian bagi membandingkan harga pada bulan **Mei dan Oktober 2018** membabitkan 417 barangan merangkumi 6 kategori utama iaitu antaranya Barangan Segar, Barangan Berbungkus, Tin, Pek, Botol dan Minuman secara keseluruhannya, **sebanyak lebih kurang 67% peratus atau 279 barangan mencatatkan penurunan harga, 30.2% atau 126 barangan mengalami kenaikan purata harga dan 2.88% atau 12 barangan tiada mengalami perubahan harga. Julat bagi penurunan harga adalah antara 0.11% hingga 37.61% manakala pecahan 126 barangan yang mengalami peningkatan harga membabitkan julat perubahan antara 0.09% hingga 41.65%.** Berpandukan kepada CPI yang juga merupakan kayu pengukur utama bagi kadar inflasi telah menunjukkan perubahan yang ketara iaitu bagi bulan Oktober 2017 CPI mencatatkan pada kadar 3.7 peratus manakala Oktober 2018 pada kadar 0.6%.

**PEMBERITAHUAN PERTANYAAN**  
**DEWAN RAKYAT MALAYSIA**  
**MESYUARAT KEDUA, PENGGAL PERTAMA**

**PERTANYAAN : LISAN**  
**DARIPADA : DR. AZMAN BIN ISMAIL**  
**KAWASAN : KUALA KEDAH**  
**TARIKH : 11 DISEMBER 2018**

**SOALAN**

Dr. Azman bin Ismail [ Kuala Kedah ] minta MENTERI PERDAGANGAN ANTARABANGSA DAN INDUSTRI menyatakan langkah-langkah Kerajaan untuk menarik pelaburan asing ke Malaysia sejak terbentuknya Kerajaan baru di Putrajaya. Berapakah jumlah pelaburan asing baru ke Malaysia sejak Mei 2018.

**JAWAPAN**

Tuan Yang di-Pertua,

Malaysia merupakan sebuah negara yang mengamalkan dasar ekonomi terbuka. Ini dapat dilihat melalui keterbukaan dan usaha berterusan Kerajaan dalam meraih pelaburan asing yang berkualiti yang akan memanfaatkan rakyat melalui limpahan ekonomi dan juga pengwujudan peluang perniagaan dan pekerjaan bernilai tinggi kepada rakyat tempatan.

Bagi terus menarik pelaburan langsung asing berkualiti tinggi, Kerajaan akan memanfaatkan trend mega terkini, terutamanya menerusi Revolusi Perindustrian 4.0 di samping pendekatan ekosistem dalam aktiviti penggalakan pelaburan bagi melengkapkan jurang dalam rantai nilai yang disasarkan.

Di antara langkah-langkah yang sedang dan akan diambil oleh Kerajaan bagi menarik pelaburan langsung asing adalah:

## SOALAN NO : 13

- (i) mengambil pendekatan langsung yang proaktif melalui strategi terbaharu Kementerian, iaitu dengan izin, “*search, seek and secure*” bagi menarik pelaburan langsung asing berkualiti tinggi dengan memberi fokus kepada industri bernilai ditambah tinggi, berteknologi tinggi dan R&D, berintensifkan modal dan pengetahuan serta tahap produktiviti tinggi, yang berupaya menjana peluang pekerjaan berpendapatan tinggi dan pelbagai kesan pengganda lain kepada ekonomi negara;
- (ii) mengkaji semula bagi tujuan menambah baik dasar pelaburan negara secara berterusan serta memperkukuhkan sistem penyampaian Kerajaan berhubung insentif dan kemudahan pelaburan agar lebih kompetitif dan mampu bersaing khususnya dengan negara-negara lain di rantau ini;
- (iii) mensasarkan bidang pertumbuhan baharu dalam sektor perkilangan dan perkhidmatan yang bernilai ditambah tinggi, berintensifkan pengetahuan, menyumbang kepada peningkatan eksport dan menjana peluang pekerjaan berpendapatan tinggi. Ini adalah selaras dengan aspirasi negara untuk menjadi negara maju dan inklusif;
- (iv) meneruskan dasar pelaburan yang liberal dan mesra pelabur seperti pelonggaran syarat pemilikan sehingga 100% bagi ekuiti asing untuk semua projek dalam sektor perkilangan dan sektor perkhidmatan terpilih serta kebebasan untuk menghantar pulang pelaburan termasuk modal, keuntungan dan dividen;
- (v) memanfaatkan inisiatif Komuniti Ekonomi ASEAN atau dengan izin *ASEAN Economic Community* dan Perjanjian Perdagangan Bebas agar Malaysia menjadi gerbang pelaburan di ASEAN dan meluaskan lagi akses pasaran perniagaan. Kerajaan juga akan terus memperkukuhkan hubungan baik dengan World Trade Organisation (WTO) untuk memastikan fasilitasi pelaburan-pelaburan asing di negara ini adalah terjamin; dan

(vi) menganjurkan misi-misi pelaburan ke luar negara untuk menarik pelaburan baharu dan berkualiti. Pada tahun ini, sebanyak 17 misi pelaburan telah dilaksanakan sehingga Oktober 2018. Di antara misi pelaburan yang telah dilaksanakan adalah:

- “*Specific Project Mission (SPM)*” – Teknologi Hijau ke Eropah (Jun 2018)
- “*Specific Project Mission (SPM)*” – Minyak dan Gas ke Eropah (Ogos 2018)
- “*Specific Project Mission (SPM)*” – Sains Hayat dan Teknologi Perubatan ke India (September 2018)
- “*Trade Investment Mission (TIM)*” ke Amerika Syarikat (Oktober 2018)
- “*Trade Investment Mission (TIM)*” ke Jepun dan Korea Selatan (Oktober 2018).

Selain itu, strategi penggalakan pelaburan negara adalah dengan meneroka dan mengembangkan sumber-sumber pelaburan asing baharu sementara terus mengekalkan sumber-sumber pelaburan sedia ada bagi mempelbagai dan meluaskan lagi sumber pelaburan asing.

Tuan Yang di-Pertua,

Bagi tempoh Mei hingga Ogos 2018, sebanyak 204 projek perkilangan dengan pelaburan bernilai RM32.3 bilion telah diluluskan. Daripada jumlah ini, pelaburan asing menyumbang RM26.8 bilion atau 83.2% daripada keseluruhan pelaburan tersebut.

Sekian, terima kasih.

**DEWAN RAKYAT  
PEMBERITAHUAN PERTANYAAN  
MESYUARAT KEDUA, PENGAL PERTAMA  
PARLIMEN KEEMPAT BELAS (2018)**

---

**PERTANYAAN : LISAN**

**TARIKH : 11 DISEMBER 2018 (SELASA)**

**DARIPADA : DATUK ZAHIDI BIN ZAINUL ABIDIN  
[ PADANG BESAR ]**

**SOALAN : 14**

**Datuk Zahidi bin Zainul Abidin [ Padang Besar ]** minta **PERDANA MENTERI** menyatakan apakah hasil yang diperoleh Malaysia dari lawatan rasmi YAB Perdana Menteri ke negara Jepun, China dan Brunei sejak Pakatan Harapan mentadbir Kerajaan Persekutuan.

**JAWAPAN: YB TUAN MOHAMED HANIPA BIN MAIDIN  
TIMBALAN MENTERI DI JABATAN PERDANA  
MENTERI**

**LAWATAN RASMI KE JEPUN**

**Tuan Yang di-Pertua,**

1. Seperti mana Ahli Yang Berhormat sedia maklum, YAB Perdana Menteri dan anggota rombongan telah mengadakan lawatan rasmi ke negara Jepun iaitu pada 10 hingga 12 Jun 2018 ke Tokyo dan pada 6 hingga 9 Ogos 2018 ke Fukuoka dan Oita.

2. Antara program utama lawatan ke negara Jepun adalah pertemuan dengan pemimpin-pemimpin Kerajaan Jepun, lawatan ke syarikat-syarikat terkemuka dan pertemuan dengan ahli-ahli perniagaan.
3. Seterusnya semasa pertemuan dengan Tuan Yang Terutama Shinzo Abe, Perdana Menteri Jepun di Tokyo, YAB Perdana Menteri telah menekankan bahawa Malaysia akan mencergaskan semula dan menambah baik Dasar Pandang ke Timur terutamanya dalam bidang pendidikan, latihan dan pelaburan bagi memperkukuhkan kerjasama serta meningkatkan daya saing perniagaan dia antara dua negara. YAB Perdana Menteri juga telah menyuarakan aspirasi Kerajaan sekarang ialah untuk memulakan sebuah lagi projek kereta nasional dengan kerjasama negara serantau seperti Jepun yang memiliki kepakaran dalam pembuatan kenderaan.
4. Pertemuan selanjutnya diadakan dengan *Japan National Press Club* dan para pemimpin pertubuhan ekonomi utama Jepun. Semasa bertemu dengan mereka, Kerajaan telah memberi jaminan bahawa hubungan dua hala di antara Malaysia dengan Jepun akan bertambah kukuh di bawah pentadbiran Kerajaan semasa. Antaranya, YAB Perdana Menteri telah meyakinkan dan menggalakkan pelaburan langsung asing (FDI) ke Malaysia. Namun, pelaburan ini perlulah memberikan peluang pekerjaan kepada rakyat Malaysia serta penggunaan bahan-bahan tempatan bagi memberi peluang pekerjaan dan pemindahan teknologi kepada industri tempatan.
5. Seterusnya, dalam lawatan kerja kedua YAB Perdana Menteri ke Jepun, beliau telah melawat ke Pusat Penciptaan Keselamatan Kereta



Api Kyushu dan Taman Teknologi Groovenauts Inc., YAB Perdana Menteri dan anggota rombongan telah diberi pendedahan berkenaan penggunaan teknologi pada kereta api bagi membolehkan Kerajaan belajar dan mengadaptasi serta menambah baik keselamatan dan mutu perkhidmatan kereta api di Malaysia.

6. Secara ringkasnya, hasil lawatan kerja YAB Perdana Menteri dan anggota rombongan ke Jepun telah memberi peluang untuk Malaysia dan Jepun untuk mengukuhkan lagi kerjasama terutamanya dalam bidang pendidikan, pelancongan, teknologi dan pengangkutan.

### **LAWATAN RASMI KE CHINA**

**Tuan Yang di-Pertua,**

7. Seterusnya, YAB Perdana Menteri dan anggota rombongan telah mengadakan lawatan rasmi ke Hangzhou dan Beijing, China pada 17 hingga 21 Ogos 2018 atas jemputan daripada Tuan Yang Terutama Li Keqiang, Perdana Menteri China. Antara program utama lawatan tersebut adalah lawatan ke ibu pejabat Kumpulan Alibaba, lawatan ke ibu pejabat Zhejiang Geely Holding Group serta Mesyuarat Dua Hala bersama pemimpin-pemimpin Kerajaan Republik Rakyat China.

8. Semasa pertemuan dengan Mr. Jack Ma, Pengerusi Kumpulan Alibaba, YAB Perdana Menteri telah menyarankan agar mereka dapat membantu sektor Industri Kecil Dan Sederhana (IKS) Malaysia untuk mengadakan latihan terutama dalam bidang e-dagang dan penguasaan teknologi.

9. Seterusnya dalam lawatan ke ibu pejabat Zhejiang Geely Holding Group, beliau dan anggota rombongan telah menyaksikan pemeteraian *Heads of Agreement* di antara Proton Holdings Berhad dan Zhejiang Geely Holding Group. YAB Perdana Menteri turut melahirkan harapan agar pihak Geely dapat terus melatih rakyat Malaysia untuk pemindahan teknologi dalam bidang berteknologi tinggi dan usaha untuk mewujudkan kilang pemasangan kenderaan Proton (pemanduan sebelah kiri) di Hangzhou dapat direalisasikan kelak.

10. Dalam pertemuan Perdana Menteri bersama komuniti perniagaan serta pemimpin-pemimpin Kerajaan China, beliau telah menegaskan bahawa Kerajaan Malaysia menyokong pelaksanaan Inisiatif *Belt and Road* (BRI). Namun, bagi menjamin kesejahteraan ekonomi di Malaysia, Perdana Menteri telah menjelaskan bahawa projek-projek di bawah inisiatif ini perlulah memberi manfaat kepada semua pihak yang terlibat terutama rakyat Malaysia. Selain itu, Perdana Menteri turut menjelaskan bahawa Kerajaan mengalu-alukan pelaburan daripada semua negara, khususnya daripada China. Namun, pelaburan-pelaburan ini perlulah memberikan peluang pekerjaan kepada rakyat Malaysia, menggunakan bahan-bahan tempatan dan memberi peluang untuk pemindahan teknologi kepada industri tempatan.

11. Secara keseluruhannya, Malaysia dan China yang telah mempunyai hubungan dua hala yang kukuh sejak terjalinnya hubungan diplomatik lebih 40 tahun turut bersetuju untuk terus mewujudkan hubungan yang lebih dinamik serta saling bekerjasama untuk meneroka bidang-bidang baharu yang bakal mendatangkan manfaat bersama dalam bidang teknologi, industri dan inovasi.

**LAWATAN RASMI KE BRUNEI**

**Tuan Yang di-Pertua,**

12. YAB Perdana Menteri dan anggota rombongan telah mengadakan lawatan rasmi ke Brunei Darussalam pada 02 dan 03 September 2018 yang merupakan lawatan balas kepada kunjungan Paduka Seri Baginda Sultan Brunei Darussalam.

13. Semasa lawatan tersebut, isu-isu berkepentingan seperti persempadanan darat dan kerjasama dalam pengeluaran minyak di Kawasan Aturan Komersil (*Commercial Arrangement Area*) telah dapat diketengahkan kepada Paduka Seri Baginda Sultan Brunei Darussalam. Kedua-dua negara telah bersetuju agar penambahbaikan dapat dilaksanakan bagi aktiviti pemuktamadan persempadanan darat dapat disegerakan.

14. Lawatan ini juga telah membuka ruang kepada Brunei dan Malaysia untuk berkongsi idea-idea baharu dalam memantapkan lagi kerjasama di antara dua negara.

Sekian, terima kasih.

**PEMBERITAHUAN PERTANYAAN DEWAN**

**PERTANYAAN : LISAN**

**DARIPADA : Tuan Steven Choong Shiau Yoon [Tebrau]**

**TARIKH : 11 Disember 2018**

**SOALAN : Tuan Steven Choong Shiau Yoon [Tebrau]**  
minta **PERDANA MENTERI** menyatakan apakah hasil terkini kajian terhadap projek kereta nasional ketiga di bawah Dasar Automotif Nasional dan sejauh manakah keperluan membangunkan kereta nasional ketiga.

**JAWAPAN : YB TUAN STEVEN CHOONG SHIAU YOON**  
**[TEBRAU]**

Tuan Yang di-Pertua,

Untuk makluman Yang Berhormat, dunia kini menyaksikan perkembangan teknologi yang cukup pesat dan pantas selaras dengan revolusi industri ke-empat. Begitu juga dengan kereta-kereta yang dihasilkan pada masa kini yang cukup sarat dengan teknologi baru untuk memudahkan pemanduan dan menjadikan pemanduan lebih selamat.

Projek kereta nasional baharu mempunyai pendekatan yang agak berbeza dengan pengeluar kereta nasional sedia ada seperti Proton dan Perodua kerana bakal menggabungkan beberapa buah syarikat teknologi dan pembekal tempatan bagi menghasilkan sebuah kenderaan.

Ucapan YAB Perdana Menteri semasa mengumumkan mengenai projek kereta nasional baharu dalam Bahasa Inggeris dengan izin, "*The idea about investing in national car is not just about building a national car, it's about becoming a catalyst for growing the Malaysian engineering capability*"

Ianya juga adalah selaras dengan hasrat kerajaan untuk menjadikan Malaysia sebagai negara pengeluar dan bukan lagi sebagai negara pengguna akan dapat dicapai dan dimanifestasikan sejajar dengan Malaysia baru yang fokus dengan pembangunan sains dan teknologi.

Projek kereta nasional baharu akan menumpukan kepada kenderaan masa hadapan seperti pemanduan berautonomi dan akan menggunakan enjin elektrik atau hibrid. Kereta nasional baharu ini juga akan berasaskan teknologi industri revolusi keempat atau pemanduan sendiri dan dijangka akan mula berada di pasaran dua tahun lagi.

Bagi memastikan kemajuan projek kereta nasional baharu ini selari dengan perkembangan semasa, kerajaan telah memandatkan kepada Kementerian Perdagangan Antarabangsa dan Industri untuk membuat kajian semula kepada Dasar Automotif Negara (NAP) dengan pihak berkepentingan supaya ia turut memenuhi keperluan industri.

Dasar Automotif Negara yang disemak semula itu akan meneliti seluruh ekosistem automotif dan menumpu kepada sambungan mobiliti, Revolusi Industri 4.0, kenderaan generasi baharu dan kecerdasan buatan (AI). Kajian semula Dasar Automotif Negara itu juga akan menyentuh berhubung pembangunan projek kereta nasional baharu.

Untuk terus bersaing, Malaysia perlu meneliti dari semua sudut dalam membawa industri ke tahap seterusnya. Kereta nasional baharu sudah tentu akan berpaksikan pengalaman yang telah dibina oleh ekosistem automotif sehingga kini, bersesuaian dengan trend pasaran dunia.

Ianya akan membuka peluang transformasi kearah kenderaan generasi baharu dan mobiliti terhubung, seiring dengan trend di masa hadapan. Ianya juga secara tidak langsung dapat mempertingkatkan Program Pembangunan Vendor tempatan dalam menyokong projek kereta nasional baharu.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJAH AZIZAH BINTI DATUK SERI  
PANGLIMA HAJI MOHD DUN [BEAUFORT]**

**TARIKH : 11 DISEMBER 2018 (SELASA)**

**SOALAN NO. 16**

minta **MENTERI PENDIDIKAN** menyatakan jumlah wang yang telah dibelanjakan di Sabah di bawah bajet 2018 sehingga September 2018 ini dan berapakah bilangan sekolah yang telah dibaik pulih/dibina di seluruh Sabah.

**JAWAPAN**

Yang di-Pertua,

Untuk makluman Ahli Yang Berhormat, peruntukan belanja pembangunan *roling plan* 3 tahun 2018 Rancangan Malaysia Ke-11 yang telah dibelanjakan sehingga bulan September 2018 bagi projek di Negeri Sabah adalah berjumlah RM95.385 juta melibatkan 181 projek. Selain daripada itu, pada tahun ini juga sebanyak RM8,397,849.16 peruntukan penyelenggaraan dan pembaikan telah disediakan untuk 227 buah sekolah di Sabah.

Sekian, terima kasih

RJM164

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL PERTAMA,  
PARLIMEN KE EMPATBELAS**

---

**PERTANYAAN : JAWAB LISAN**

**DARIPADA : YB TUAN AWANG HUSAINI BIN SAHARI  
(PUTATAN)**

**TARIKH : 11 DISEMBER 2018**

**SOALAN : 17**

**Tuan Awang Husaini bin Sahari [ Putatan ] minta MENTERI DALAM NEGERI** menyatakan adakah Kementerian akan menambahkan peruntukan bagi aset Agensi Penguatkuasaan Maritim Malaysia (APMM) bagi mempersiapkan agensi tersebut di Sabah terutama di Kota Kinabalu yang mempunyai keluasan maritim 83,342.6 kilometer persegi demi menjaga kepentingan dan keselamatan nasional negara Malaysia

**JAWAPAN**

Tuan Yang di-Pertua,

Untuk makluman Ahli Yang Berhormat dan Dewan Yang Mulia ini, Kementerian Dalam Negeri melalui Agensi Penguatkuasaan Maritim Malaysia (APMM) bersedia untuk menambah aset di Negeri Sabah bagi tujuan menguatkuasakan mana-mana undang-undang persekutuan dan melaksanakan operasi penguatkuasaan maritim di perairan Sabah.

Sehingga kini, APMM dilengkapi dengan aset-aset maritim dari agensi-agensi terdahulu dan juga aset baru seperti *Offshore Patrol Vessel* (OPV), Kapal Ronda Generasi Baru (NGPC), Bot Pemintas, Bot Penyelamat dan Sistem Pengawasan Maritim (Laut).

Kerajaan telah meluluskan peruntukan kewangan kepada APMM bagi aset-aset laut seperti perolehan 6 buah Kapal Ronda Generasi Baru (NGPC) berukuran 45 meter panjang yang dilengkapi dengan *Unmanned Aerial Vehicle* (UAV). Buat masa ini, 1 buah NGPC dan sebuah OPV (KM ARAU) telah ditempatkan di APMM Negeri Sabah yang boleh diaturgerak ke kawasan operasi pada bila-bila masa. Selain itu, pembinaan sebuah *Remote Sensor Site* (RSS) Sabah Fasa II di Pulau Malawali juga sedang dilaksanakan bagi tujuan ini.

Bagi perancangan seterusnya, Kerajaan telah merangka beberapa program bagi memperkasakan APMM Negeri Sabah seperti pembinaan Stesen Udara di Sabah dan pembelian pesawat udara yang amat diperlukan sebagai *Forward Operation Base* (FOB) dan Pejabat Zon Maritim Kudat yang baharu yang dilengkapi dengan kuarters.

Selain itu, APMM juga merancang untuk membuat perolehan sebuah (1) Kapal Induk Pelbagai Fungsi (MPMS) yang dilengkapi enam (6) buah bot laju dan *Unmanned Aerial Vehicle* (UAV) serta boleh mengoperasikan sebuah (1) pesawat helikopter bagi memantapkan keberkesanan APMM dalam menguatkuasakan undang-undang dan operasi maritim di Sabah.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN** : **LISAN**  
**DARIPADA** : **Y.B. DATO' SERI DR. AHMAD ZAHID BIN  
HAMIDI [ BAGAN DATOK ]**  
**TARIKH** : **11 DISEMBER 2018 (SELASA)**

**SOALAN NO. 18**

Minta **MENTERI KEWANGAN** menyatakan berapakah jumlah syarikat yang telah berdaftar di bawah SST serta berapakah jumlah kutipan hasil SST untuk bulan pertama sejak ianya dilaksanakan semula pada 1 September 2018 yang lalu.

**JAWAPAN**

Tuan Yang di-Pertua,

Untuk makluman Ahli Yang Berhormat, bilangan syarikat yang berdaftar di bawah SST bagi tempoh sehingga 4 Disember 2018 adalah sebanyak 79,119 perniagaan. Daripada bilangan tersebut, sebanyak 50,866 adalah berdaftar di bawah cukai perkhidmatan manakala sebanyak 28,253 adalah berdaftar di bawah cukai jualan.

Jumlah kutipan SST dari 1 September 2018 sehingga 4 Disember 2018 adalah sebanyak RM4.05 bilion.

**SOALAN NO: 19**

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : TUAN WONG HON WAI  
(BUKIT BENDERA)**

**TARIKH : 11 DISEMBER 2018**

**SOALAN : 19**

**Tuan Wong Hon Wai [ Bukit Bendera ]** minta **PERDANA MENTERI** menyatakan secara terperinci Kod Etika terbaru bagi Anggota Pentadbiran dan Ahli Parlimen serta apakah variasi dan penambahbaikan Kod Etika tersebut berbanding sebelum PRU13.

**JAWAPAN: YB TUAN MOHAMED HANIPA BIN MAIDIN  
TIMBALAN MENTERI  
DI JABATAN PERDANA MENTERI**

Tuan Yang di-Pertua,

1. Kod Etika bagi Anggota Pentadbiran yang digunakan dalam penggal Parlimen ke-13 telah diwujudkan oleh kerajaan sebelum ini sebagai panduan untuk setiap Anggota Pentadbiran berkelakuan mengikut landasan moral dan akhlak selaras dengan prinsip-prinsip Rukun Negara Malaysia.

2. Kerajaan berpendapat bahawa Kod Etika Anggota Pentadbiran tersebut tidak menyeluruh dan ia perlu ditambah baik dengan memastikan bahawa semua Anggota Pentadbiran dan Ahli Parlimen adalah tertakluk kepada Kod Etika Anggota Pentadbiran dan Ahli Parlimen yang baharu.

3. Bagi tujuan ketelusan dan memenuhi manifesto Kerajaan Pakatan Harapan, maka Kod Etika Anggota Pentadbiran dan Ahli Parlimen yang baharu telah ditambah baik membabitkan 9 prinsip utama seperti yang berikut:

- (i) Prinsip tanggungjawab bersama (*collective responsibility*);
- (ii) Penglibatan dalam perniagaan;
- (iii) Perisytiharan harta;
- (iv) Percanggahan kepentingan (*Conflict of Interest*);
- (v) Hadiah, Keraian dan Upahan;
- (vi) Menjaga kerahsiaan kerajaan;
- (vii) Penglibatan dalam badan-badan bukan kerajaan (NGO) dan pertubuhan-pertubuhan sukan, profesional, sosial dan lain-lain;
- (viii) Tatakelakuan diri; dan
- (ix) Tatakelakuan pasangan.

4. Namun begitu, penambahbaikan utama adalah dengan memperkenalkan dua dasar baharu iaitu Dasar Perisytiharan Harta dan Dasar Penerimaan Hadiah. Berkenaan dengan perisytiharan harta, kesemua Anggota Pentadbiran kini perlu mengisytiharkan harta kepada Perdana Menteri dan disalinkan kepada SPRM manakala bagi Perdana Menteri pula perisytiharan harta tersebut

hendaklah dikemukakan terus kepada SPRM. Seterusnya perisytiharan harta kali pertama Anggota Pentadbiran dan Ahli Parlimen Kerajaan dibuat dalam tempoh 3 bulan selepas mengangkat sumpah jawatan. Bagi menjamin ketelusan, maka Kerajaan telah menetapkan bahawa maklumat perisytiharan harta Anggota Pentadbiran dan Ahli Parlimen Kerajaan akan dipaparkan di portal SPRM selama 3 bulan bermula tarikh penerimaan borang perisytiharan yang lengkap.

5. Berkenaan dengan dasar pemberian hadiah, keraian dan upahan, Kerajaan telah menetapkan agar semua Anggota Pentadbiran termasuk Setiausaha Parlimen atau Setiausaha Politik mengemukakan laporan penerimaan hadiah, keraian dan upahan kepada Perdana Menteri dan disalinkan kepada SPRM. Bagi Perdana Menteri pula, laporan penerimaan laporan penerimaan hadiah, keraian dan upahan oleh tersebut akan dikemukakan terus kepada SPRM. Seterusnya Kerajaan telah menetapkan hanya hadiah dalam bentuk buah, bunga, sayur, makanan, *plaque*, *pennant* atau barang kraf dihasilkan sendiri di bawah RM500 tidak perlu dilaporkan. Bagi hadiah, keraian dan upahan melebihi RM5,000 atau  $\frac{1}{4}$  emolumen pula, ia hanya boleh diambil atau disimpan oleh mana-mana Anggota Pentadbiran dengan kebenaran bertulis Perdana Menteri dengan sesalinan permohonan tersebut dikemukakan kepada Suruhanjaya Pencegahan Rasuah Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' HASBULLAH BIN OSMAN  
[GERIK]**

**TARIKH : 11 DISEMBER 2018**

**SOALAN NO. 20**

Minta **MENTERI PENDIDIKAN** menyatakan bercadang untuk menghapuskan atau menggubal Akta Universiti dan Kolej Universiti 1971 (AUKU) bagi memberi kebebasan kepada para pelajar universiti sesuai cadangan pengundi pilihan raya di turun had umur dari 21 tahun kepada 18 tahun.

**JAWAPAN**

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah menubuhkan Jawatankuasa Kerja yang berperanan untuk menyediakan input dan draf kandungan baru bagi menggantikan Akta Universiti dan Kolej Universiti 1971 (AUKU) menjelang tahun 2020, menyelaraskan laporan berkala dan pembentangan kepada Jawatankuasa Teknikal Pelaksanaan Pemansuhan dan Pindaan AUKU.

Manakala Jawatankuasa Teknikal Pelaksanaan Pemansuhan dan Pindaan AUKU pula berperanan sebagai menyelaraskan, mengkaji dan menyemak peruntukan berkaitan yang terdapat dalam AUKU secara menyeluruh dan mengemukakan laporan kepada Jawatankuasa Induk.

Kesemua ahli Jawatankuasa ini dianggotai oleh ahli akademik, bukan akademik, penasihat undang-undang, wakil pelajar dan wakil persatuan yang merupakan pemegang taruh universiti awam dan swasta.

Bagi pelaksanaan jangka pendek (*quick win*), KPM telah bersetuju untuk membatalkan peruntukan yang menghalang pelajar terlibat dalam aktiviti parti politik di dalam kampus dan pindaan tersebut akan dibentangkan di Parlimen pada bulan Disember 2018.

Pindaan AUKU ini dilaksanakan bersekali dengan Akta Institusi Pendidikan Tinggi Swasta 1996 [Akta 555] dan Akta Institusi-Institusi Pelajaran (Tatatertib) 1976 [Akta 174] yang mempunyai peruntukan sama dan terpakai kepada Institusi Pendidikan Tinggi Swasta, Politeknik, Kolej Komuniti dan Institut Perguruan Malaysia.

RJM143

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN HASSAN BIN ABDUL KARIM**  
**[ PASIR GUDANG ]**  
**TARIKH : 11 DECEMBER 2018 (SELASA)**

**SOALAN NO. 21**

**Y.B. TUAN HASSAN BIN ABDUL KARIM [ PASIR GUDANG ]** minta **MENTERI KEWANGAN** menyatakan apakah langkah-langkah yang akan diambil untuk mengurangkan defisit kewangan (fiscal deficit) negara.

**JAWAPAN**

Tuan Yang di-Pertua,

1. Seperti yang telah dibentangkan dalam ucapan Belanjawan 2019, hutang dan liabiliti Kerajaan pada akhir Jun 2018 adalah sebanyak RM1.065 bilion atau 74.5% daripada KDNK. Jumlah komitmen yang besar ini boleh menjejaskan sistem penyampaian perkhidmatan Kerajaan, kesejahteraan rakyat dan agenda pembangunan negara memandangkan Kerajaan terpaksa menyediakan peruntukan yang besar bagi memenuhi jumlah komitmen berkaitan dan pada masa yang sama mengurangkan peruntukan bagi perbelanjaan produktif.

2. Oleh itu, dalam jangka masa pendek, keutamaan Kerajaan adalah untuk mengukuhkan kedudukan kewangannya dengan matlamat mengurangkan jumlah hutang dan liabiliti. Selain itu, Kerajaan juga telah menyediakan peruntukan dalam Belanjawan 2019 untuk membayar tunggakan tuntutan bayaran balik cukai melibatkan jumlah yang besar sehingga RM37 bilion. Penyelesaian tunggakan ini adalah penting untuk diselesaikan bagi memulihkan kewangan Kerajaan selain memenuhi tanggungjawab moral untuk memulangkan kesemua tunggakan bayaran balik cukai kepada individu, syarikat dan rakyat Malaysia.

Tuan Yang di-Pertua,

3. Bagi meningkatkan kutipan hasil, seperti yang telah diumumkan dalam Belanjawan 2019, Kerajaan telah menubuhkan Jawatankuasa Pembaharuan Cukai bagi menjalankan kajian menyeluruh mengenai sistem percukaian negara termasuk mengenal pasti sumber pendapatan baru. Inisiatif yang akan dilaksanakan adalah menyemak semula dasar percukaian khususnya memperkenalkan cukai baharu serta menyemak semula kadar cukai, insentif dan layanan cukai sedia ada; mempertingkatkan penguatkuasaan membabitkan aktiviti membanteras penyeludupan dan memperkenalkan kaedah baharu menggalakkan



pembayaran cukai. Kerajaan juga akan melaksanakan inisiatif memanfaatkan aset yang meliputi langkah mengurangkan pegangan dalam syarikat bukan strategik serta menambah baik kaedah penjualan aset Kerajaan khususnya melalui tender terbuka.

4. Kerajaan juga akan meningkatkan kecekapan perbelanjaan melalui langkah rasionalisasi perbelanjaan dengan mengenal pasti program dan projek yang mempunyai keutamaan untuk dilaksanakan. Pada masa yang sama, langkah mengurangkan ketirisan dan pembaziran akan dilaksanakan dengan menambahbaik kaedah perolehan Kerajaan serta klausa dan terma pengurusan kontrak untuk memastikan perbelanjaan Kerajaan adalah lebih berhemat dan cekap dari segi kos. Selain itu, Kerajaan juga telah melaksanakan *zero based budgeting* serta menyemak semula pelaksanaan projek mega seperti *Trans-Sabah Gas Pipeline (TSFGP)*, *Multi-Product Pipeline (MPP)*, *East Coast Rail Link (ECRL)* dan *High Speed Rail (HSR)*. Kerajaan juga telah merunding semula kos bagi projek LRT3, MRT2 dan mendapat penjimatan serta menghentikan amalan pelaksanaan PPP secara *deferred payment*. Di samping itu, Kerajaan akan melaksanakan mekanisme subsidi secara bersasar khususnya bagi subsidi bahan api dan elektrik.

5. Melalui inisiatif semakan semula dasar percukaian, antara langkah yang akan dilaksanakan bagi meningkatkan hasil Kerajaan adalah seperti berikut:

- i. Mengenakan Cukai Perkhidmatan ke atas perkhidmatan yang diimport termasuk perkhidmatan atas talian;
- ii. Melancarkan Program Khas Pengakuan Sukarela (*Special Voluntary Disclosure Program*) bagi meningkatkan pengisytiharan pendapatan oleh pembayar cukai secara sukarela;
- iii. Melaksanakan Pertukaran Maklumat Secara Automatik (AEOI) dengan pihak berkuasa percukaian lain di bawah inisiatif *Organisation for Economic and Co-Operation and Development* (OECD) untuk meningkatkan ketelusan percukaian;

- iv. Mengkaji semula layanan cukai dan insentif sedia ada di bawah pelbagai perundangan bagi memastikan ianya relevan dan dapat mengurangkan ketirisan hasil;
- v. Meningkatkan aktiviti audit dan siasatan oleh Lembaga Hasil Dalam Negeri dan Jabatan Kastam Diraja Malaysia (JKDM) bagi meningkatkan pematuhan cukai dan mengurangkan jurang cukai.
- vi. Meningkatkan usaha membanteras aktiviti penyeludupan dan penipuan khususnya penyeludupan rokok oleh JKDM;
- vii. Mengenakan levi pelepasan (*departure levy*) bagi semua penumpang ke luar negara melalui laluan udara;
- viii. Memperkemas Cukai Keuntungan Harta Tanah (*Real Property Gains Tax*) ke atas keuntungan daripada pelupusan harta tanah dan saham dalam syarikat hartanah dalam tahun ke-6 dan tahun seterusnya, di mana harga pemerolehan hartanah akan diambil kira berdasarkan nilai pasaran pada tahun 2000 sekiranya hartanah diperolehi sebelum tahun 2000.;
- ix. Menaikkan kadar duti setem bagi pemindahan hartanah bernilai lebih RM1 juta daripada 3% kepada 4%;
- x. Menamatkan pengecualian cukai pendapatan faedah yang diperolehi daripada dana pasaran wang pemborong (*wholesale money market funds*) kerana dana ini telah mencatatkan pertumbuhan yang kukuh pada kadar 24% setiap tahun sejak 2010; dan
- xi. Menaikkan kadar cukai, fi dan levi ke atas sektor perjudian yang tidak dinaikkan sejak tahun 2005.

6. Melalui inisiatif memanfaatkan aset, Kerajaan akan melaksanakan langkah seperti berikut:

- i. Mengurangkan pegangan dalam syarikat bukan strategik;
- ii. Melaksanakan model kerjasama awam swasta (PPP) yang sebenar bagi projek berdasarkan transaksi tukaran tanah secara tender terbuka dan bukannya menjalankan kaedah rundingan terus;
- iii. Melaksanakan penjualan tanah secara berjadual dan berperingkat kepada pembida tertinggi tertakluk kepada syarat tanah; dan
- iv. Menswastakan aset infrastruktur Kerajaan melalui pewujudan Amanah Pelaburan Hartanah (REIT) bagi Lapangan Terbang.

7. Selain itu, kedudukan aliran masuk pelaburan langsung asing (Foreign Direct Investment) adalah berdasarkan laporanimbangan pembayaran oleh Jabatan Perangkaan Malaysia. Maklumat FDI ke Malaysia setakat ini adalah sehingga September 2018. Aliran masuk bersih FDI bagi tempoh Januari-September 2018 mencatatkan jumlah RM18.8 bilion. Malaysia kekal sebagai destinasi pelaburan yang menarik berikutan usaha berterusan Kerajaan dalam menyediakan persekitaran yang kompetitif serta mesra perniagaan. Sektor yang menjadi tumpuan FDI adalah pembuatan; perlombongan & kuari; pemborongan & peruncitan; maklumat & komunikasi; serta kewangan dan insurans. Antara negara yang tertinggi yang menjadi sumber FDI dari Amerika Syarikat, Hong Kong dan United Kingdom.

8. Manakala, bagi 10 bulan pertama tahun 2018, jumlah perdagangan berkembang 6.5% kepada RM1.558 trilion berbanding tempoh yang sama pada tahun 2017. Eksport meningkat 7.5% kepada RM829.89 bilion sementara import meningkat 5.4% kepada RM727.88 bilion. Lebih dagangan untuk tempoh ini meningkat sebanyak 25.6% kepada RM102.01 bilion berbanding tempoh yang sama tahun lepas.

9. Berdasarkan langkah-langkah yang telah dinyatakan, Kerajaan telah menetapkan sasaran defisit fiskal pada paras 3.7% daripada KDNK bagi tahun 2018 dan berkurang kepada 2.8% pada tahun 2021. Usaha meningkatkan hasil serta kecekapan dan keberkesanan perbelanjaan akan diteruskan dari semasa ke semasa bagi memastikan kewangan Kerajaan dapat dipulihkan dengan seberapa segera. Oleh itu, Kerajaan yakin dapat mengurangkan paras hutang dan liabilitinya di samping terus melaksanakan program dan projek terutamanya yang berkaitan dengan kesejahteraan rakyat serta mempunyai kesan pengganda ekonomi yang tinggi. Ini juga ternyata apabila Bloomberg mengekalkan Malaysia pada tempat teratas berbanding pasaran ekonomi sedang pesat membangun (emerging economies) yang lain berikutan lebih akaun semasa, prospek dan penilaian pertumbuhan ekonomi yang stabil. Selain itu, inflasi meningkat 0.6% pada Oktober 2018 serta hasil kadar hasil bon kerajaan bertempoh matang 10-tahun pula mencatat 4.08%.

**PEMBERITAHUAN PERTANYAAN BAGI JAWAPAN LISAN**  
**MESYUARAT KEDUA, PENGGAL PERTAMA**  
**PARLIMEN KEEMPAT BELAS**  
**MAJLIS MESYUARAT DEWAN RAKYAT**  
**15 OKTOBER HINGGA 11 DISEMBER 2018**

**PERTANYAAN : LISAN**

**DARIPADA : DATO' SRI HAJAH NANCY SHUKRI**  
**[ BATANG SADONG ]**

**TARIKH : 11 DISEMBER 2018 (SELASA)**

**SOALAN :**

**Dato' Sri Hajah Nancy Shukri [ Batang Sadong ]** minta **MENTERI INDUSTRI UTAMA** menyatakan apakah langkah yang telah diambil oleh Kementerian untuk menangani masalah lebihan stok minyak sawit.

**JAWAPAN**

Tuan Yang di-Pertua,

Antara langkah yang sedang diusahakan oleh Kerajaan adalah meningkatkan penggunaan minyak sawit bagi menangani masalah lebihan stok minyak sawit dalam negara melalui peningkatan adunan biobahan api sawit dengan diesel petroleum dari Program B5 ke Program B7 (adunan 7% biodiesel sawit dan 93% diesel petroleum). Program B7 kini menggunakan sekitar 350,000 tan minyak sawit setahun. Kerajaan seterusnya akan meningkatkan penggunaan domestik produk sawit melalui perlaksanaan program Biodiesel B10 bagi sektor pengangkutan mulai 1 Februari 2019 dan B7 bagi sektor industri mulai 1 Julai 2019. Langkah ini dijangka dapat meningkatkan penggunaan minyak sawit kepada sekitar 761,000 tan setahun.

Pada masa ini, harga minyak sawit mentah (CPO) yang berada pada paras di bawah RM2,250.00 per tan tidak dikenakan duti eksport. Ini dapat menggalakkan pihak industri untuk mengeksport lebih banyak minyak sawit seterusnya mengurangkan paras stok sedia ada.

Sementara itu, langkah-langkah lain untuk memperkukuhkan harga sawit adalah termasuk:

- i. pelaksanaan Skim Pensijilan Minyak Sawit Mampan Malaysia (MSPO) yang akan dijadikan mandatori pada 1 Januari 2020. Ini adalah satu langkah ke arah mewujudkan sistem kemampunan yang diterima secara global dalam menjenamakan minyak sawit milik Malaysia yang seterusnya diterima sebagai pilihan utama pengguna global. Ini akan membuka akses pasaran yang lebih luas untuk pasaran minyak sawit mampan Malaysia di negara-negara pengimport;
- ii. memperkukuh pasaran eksport sedia ada serta menembusi pasaran-pasaran baru bagi produk-produk berasaskan sawit. Industri sawit negara juga digalakkan untuk meneroka atau memperluaskan perniagaan mereka ke pasaran yang disifatkan sebagai '*niche markets*' untuk mendapatkan nilai pasaran yang lebih tinggi;
- iii. meningkatkan aktiviti penyelidikan dan pembangunan (R&D) dalam penghasilan produk-produk baru serta memberi nilai tambah kepada produk hiliran komoditi; dan
- iv. penanaman semula pokok yang tidak lagi produktif ketika harga komoditi berada di paras yang rendah juga boleh membantu mengurangkan stok bahan mentah komoditi ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' JOHARI BIN ABDUL**  
**[ SUNGAI PETANI ]**  
**TARIKH : 11 DECEMBER 2018 (SELASA)**

**SOALAN NO. 23**

**Y.B. DATO' JOHARI BIN ABDUL [ SUNGAI PETANI ]** minta **MENTERI KEWANGAN** menyatakan apakah sebab nilai mata wang Ringgit Malaysia masih rendah berbanding dengan US Dollar, dan apakah strategi Kerajaan untuk meningkatkan nilai ini kepada tahap yang lebih melegakan.

**JAWAPAN**

Tuan Yang di-Pertua,

1. Sehingga 7 Disember 2018, nilai ringgit telah menyusut sebanyak 2.9% manakala nilai mata wang serantau yang lain telah menyusut sebanyak 0.8% hingga 6.4% berbanding dolar AS. Walau bagaimanapun, berbanding dengan mata wang serantau, prestasi ringgit adalah lebih stabil. Ringgit telah menambah nilai sebanyak 2.7% berbanding peso Filipina dan 4.2% berbanding rupiah Indonesia bagi tempoh yang sama.
2. Faktor utama kejatuhan nilai ringgit serta mata wang serantau kebelakangan ini adalah akibat aliran keluar dana asing yang didorong oleh faktor-faktor luaran, antaranya:
  - a. ketidakstabilan pasaran dunia akibat risiko perang perdagangan (*trade war*) antara Amerika Syarikat – China;
  - b. kenaikan kadar faedah oleh bank pusat Amerika Syarikat menyebabkan pelabur menilai dan mengimbangi semula kedudukan portfolio mereka dalam pasaran kewangan “ekonomi sedang pesat membangun” (*emerging economies*); dan
  - c. kebimbangan mengenai risiko kesan penularan (*contagion effect*) dalam kalangan mata wang ekonomi sedang pesat membangun berikutan kejatuhan ketara peso Argentina dan lira Turki, yang telah menyusut nilai sebanyak 50.2% dan 28.4% masing-masing berbanding dengan dolar AS sehingga 7 Disember 2018.



Tuan Yang di-Pertua,

3. Dalam keadaan pasaran kewangan global yang tidak menentu ini, kadar pertukaran ringgit yang fleksibel telah memainkan peranan yang penting sebagai penyerap kejutan luaran tanpa menjejaskan aktiviti ekonomi domestik. Namun begitu, volatiliti ringgit yang ketara boleh menjejaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Oleh itu, Kerajaan akan sentiasa memastikan keadaan pasaran kewangan lebih lancar dan mengambil langkah proaktif dengan memperkenalkan langkah-langkah untuk memastikan kecairan yang mencukupi, pasaran yang berdaya tahan dan mengurangkan aktiviti spekulasi dalam pasaran.
4. Antara langkah-langkah tersebut adalah penetapan syarat supaya sebahagian besar hasil eksport dalam mata wang asing ditukar kepada ringgit. Langkah ini bertujuan menambahkan mudah tunai wang asing dalam pasaran dalam negeri dan peningkatan penguatkuasaan ke atas peraturan tukaran asing sedia ada bagi mencegah mata wang ringgit diniagakan di luar pesisir bagi mengekang aktiviti spekulasi.
5. Liberalisasi progresif peraturan pentadbiran tukaran asing juga menghasilkan lebih banyak rizab yang tidak berpusat. Perkara ini dicerminkan dalam peningkatan pemerolehan aset di luar negara oleh bank dan korporat pemastautin. Secara khususnya, bank dan korporat pemastautin memegang tiga perempat daripada aset luar negeri Malaysia yang boleh digunakan untuk memenuhi obligasi hutang luar negeri tanpa membuat sebarang tuntutan ke atas rizab antarabangsa BNM.

Tuan Yang di-Pertua,

6. Berdasarkan Bloomberg, Malaysia kekal berada pada tempat teratas berbanding pasaran ekonomi sedang pesat membangun (*emerging economies*) yang lain berikutan lebihan akaun semasa, prospek dan penilaian pertumbuhan ekonomi yang stabil. Selain itu, inflasi meningkat 0.6% pada Oktober 2018 serta hasil kadar hasil bon kerajaan bertempoh matang 10-tahun pula mencatat 4.08%. Dalam jangka masa panjang, nilai ringgit akan didorong terutamanya oleh kekuatan asas ekonomi negara. Sehubungan itu, Malaysia perlu menumpukan usaha untuk meningkatkan daya tahan ekonomi dengan mempelbagaikan sumber ekonomi, memperkukuh daya saing ekonomi dan kedudukan fiskal negara. Dengan ini, prestasi ringgit, rizab negara dan pasaran modal akan terus meningkat seiring dengan pengukuhan asas ekonomi negara dan pasaran kewangan global.

**PEMBERITAHUAN PERTANYAAN DEWAN RAKYAT**

**PERTANYAAN : PERTANYAAN-PERTANYAAN JAWAB LISAN**

**DARIPADA : DATO' MOHD. NIZAR BIN HAJI ZAKARIA**

**TARIKH : 11 DISEMBER 2018**

**SOALAN :**

**DATO' MOHD. NIZAR BIN HAJI ZAKARIA [ PARIT ] minta MENTERI INDUSTRI UTAMA menyatakan :-**

- (a) apakah terdapat sebarang usaha penerokaan pasaran baharu terhadap industri getah; dan
- (b) adakah terdapat sebarang bentuk penyelidikan yang telah dilaksanakan oleh Kementerian bagi meningkatkan kualiti getah.

**JAWAPAN:**

Tuan Yang Di-Pertua,

**Soalan (a) Penerokaan pasaran baharu terhadap industri getah**

Penerokaan pasaran baharu terhadap industri getah dilakukan melalui misi ekonomi dan pelaburan yang telah diadakan di beberapa negara. Contohnya, Kementerian Industri Utama bersama Lembaga Getah Malaysia (LGM) dan Majlis Promosi Eksport Getah Malaysia (MREPC) telah mengadakan Misi Ekonomi dan Pelaburan ke China, Mesir, Magribi dan Colombia pada Ogos dan September 2018.

Semasa Misi Ekonomi ke China, LGM telah menandatangani MoU bersama-sama Hainan State Farms Bureau (HSF) bagi kerjasama dalam bidang teknologi jalan bitumen getah (*rubberized road bitumen technology*) pada 20 Ogos 2018.

Selain daripada itu, Kerajaan melalui MREPC, juga melaksanakan usaha pemasaran dan promosi untuk mengembang pasaran sedia ada dan meneroka pasaran baru bagi barangan getah negara. Beberapa usaha yang telah dan sedang dilaksanakan oleh MREPC pada tahun 2018 termasuk:

(i) Mengambil bahagian dalam pelbagai pameran perdagangan yang sesuai untuk promosi barangan getah Malaysia. Pada tahun 2018, MREPC telah dan akan menyertai pameran perdagangan di Amerika Syarikat, Belanda, China, Colombia, India, Jerman, Jepun, Myanmar, New Zealand dan United Arab Emirates (UAE) untuk mempromosikan sarung tangan getah, peranti perubatan getah (*rubber medical devices*), komponen automotif getah, gelas getah redaman tinggi (*high-damping rubber bearings*), benang getah prarawat (*precured treads*), sistem sendi pengembangan (*expansion joints*), getah *fender* marin (*dock fenders*), pad getah penampakan keretapi (*rail pads*) dan lain-lain lagi. Antara negara-negara ini, Colombia dan New Zealand merupakan pasaran baru yang diterokai oleh

MREPC masing-masing untuk mempromosikan peranti perubatan getah dan gelas getah redaman tinggi;

(ii) Menganjurkan seminar antarabangsa mengenai barangan getah Malaysia untuk pakar perubatan dan kakitangan kesihatan bagi meningkatkan kesedaran mereka mengenai kepentingan penggunaan sarung tangan perubatan dalam mencegah penyakit berjangkit demi mempromosikan sarungan tangan perubatan Malaysia;

(iii) Menganjurkan seminar antarabangsa di negara-negara seperti Indonesia dan Filipina yang menghadapi kekerapan gempa bumi bagi mempromosikan gelas getah redaman tinggi; dan

(iv) Mempromosikan barangan getah melalui pengiklanan dengan tujuan menonjolkan barangan getah negara yang berkualiti dan Malaysia sebagai pengeluar dan pengeksport utama barangan getah.

Selain daripada itu, pejabat-pejabat MREPC di luar negara iaitu Washington, Shanghai, Guangzhou dan Mumbai juga mengambil tindakan pemasaran seumpama bagi mempromosi dan memasarkan barangan getah Malaysia. Untuk memperkukuhkan lagi usaha pemasaran di luar negara, MREPC telah mewujudkan satu lagi pejabat luar negara yang baru pada tahun ini, iaitu di Rotterdam, Belanda yang akan menumpu perhatian kepada usaha pemasaran di Eropah. Dengan pewujudan pejabat baru di Eropah ini, usaha ke arah meningkatkan eksport barangan getah Malaysia di rantau Eropah akan lebih dipergiatkan.

**Soalan (b) Penyelidikan bagi meningkatkan kualiti getah**

Antara penyelidikan yang dilaksanakan bagi meningkatkan kualiti getah adalah seperti berikut:

(i) Pengenalan kepada Ekoprena dan Pureprena

Ekoprena dan Pureprena diperkenalkan oleh LGM sebagai bahan getah mesra alam atau “green material” kerana penghasilannya menggunakan bahan-bahan semulajadi, tidak seperti getah sintetik yang dihasilkan daripada sumber petroleum. Merupakan generasi baru getah ternyah protin yang dihasilkan melalui proses inovasi secara optimum dan di bawah penelitian kawalan yang ketat bagi memastikan kualiti getah yang dihasilkan adalah terjamin.

(ii) Penghasilan Klon berhasil tinggi

LGM telah membuat kajian dan pengesyoran bahan tanaman kepada industri getah di sektor hulu. Pengesyoran klon LGM telah dibuat dengan klon-klon Kumpulan 1 yang terdiri daripada RRIM 928, RRIM 2001, RRIM 2002, PB 260, PB 350. Klon-klon Kumpulan 2 pula terdiri daripada RRIM 2007, RRIM 2023, RRIM 2024, RRIM 3001. Klon-klon ini berpotensi untuk menghasilkan produktiviti kawasan dengan 2000 kg/ha/tahun. Klon-klon ini telah ditanam oleh estet dan pekebun-pekebun kecil getah.

(iii) Latihan dan Amalan Pertanian Baik (GAP)

LGM juga sentiasa menjalankan kursus, latihan dan memberikan taklimat dari semasa ke semasa mengenai GAP kepada pekebun kecil. GAP yang diketengahkan merangkumi topik penanaman dan penyelenggaraan, pembajaan, rangsangan dan penorehan atau penuaian. GAP yang berterusan bukan sahaja boleh meningkatkan produktiviti getah malahan dapat memberikan kualiti getah yang baik. Sekian terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : TUAN WONG TIEN FATT @ WONG NYUK**  
**FOH [SANDAKAN]**  
**TARIKH : 11 DISEMBER 2018 (SELASA)**

**SOALAN NO.25**

minta **MENTERI TENAGA, SAINS, TEKNOLOGI, ALAM SEKITAR  
DAN PERUBAHAN IKLIM** menyatakan skim-skim yang sedia ada atau akan dilancarkan oleh Kementerian bagi membantu golongan usahawan khususnya golongan muda untuk melaburkan dalam sektor teknologi dan inovasi.

**JAWAPAN:**

Tuan Yang di-Pertua,

Kementerian Tenaga, Sains, Teknologi, Alam Sekitar Dan Perubahan Iklim (MESTECC) dan agensi pembiayaan di bawah seliaannya menawarkan pelbagai skim pembiayaan untuk membantu golongan usahawan, termasuk golongan muda untuk melabur dalam sektor teknologi dan inovasi. Pembiayaan yang ditawarkan adalah berdasarkan *Technology Readiness Level* (TRL) hasil R&D dan meliputi pelbagai fasa kesediaan teknologi bermula dari *pre-seed*, *seed*, *growth* hingga *expansion*. Bentuk pembiayaan adalah geran, ekuiti dan pinjaman pada kadar keuntungan yang kompetitif.

Dana R&D yang diuruskan oleh MESTECC meliputi skim Dana SMART, Dana Inovasi dan Dana Fasilitasi menawarkan pembiayaan projek R&D bermula dari penghasilan *Proof of Concept* sehingga pra-pengkomersialan produk. Bagi Dana SMART, pembiayaan adalah sehingga RM3juta bagi tempoh 24 bulan, manakala bagi Dana Inovasi dan Dana Fasilitasi pembiayaan yang ditawarkan adalah sehingga RM500,000 bagi tempoh 18 bulan. Golongan usahawan dan penyelidik yang layak untuk memohon Dana R&D meliputi individu, syarikat milikan tunggal/perkongsian, koperasi berdaftar, persatuan/NGO, SME (*Small Medium Enterprise*), IPT (Institut Pengajian Tinggi) dan RI (Institut Penyelidikan). Pembiayaan yang dibuka sepanjang tahun ini memberi peluang untuk golongan usahawan melibatkan diri dalam aktiviti R&D untuk tujuan pengkomersialan.

Malaysian Technology Development Corporation (MTDC) menawarkan skim *Commercialization of R&D Fund* (CRDF) dan *Technology Acquisition Fund* (TAF) kepada golongan SME untuk mengkomersialkan produk R&D. Syarikat ditawarkan sehingga RM4 juta dalam bentuk geran dan *convertable promissory notes* untuk membiayai pengkomersialan produk R&D dalam bidang-bidang *Advance Technology*, *ICT*, *Green Technology* dan *Biotechnology*.



Bioeconomy Corporation (Bioeconomy) menawarkan SME bioteknologi pembiayaan dalam bentuk *soft loan* pada kadar keuntungan yang kompetitif sehingga RM3juta melalui skim *Biotechnology Commercialisation Fund* (BCF2.0). Skop pembiayaan meliputi *working* dan *business expansion capital*.

*Malaysian Debt Venture* (MDV) menawarkan SME pembiayaan dalam bentuk *soft loan* pada kadar keuntungan yang kompetitif. Pembiayaan ditawarkan dari peringkat pra-pengkomersialan, *growth* dan *expansion* untuk pelbagai skop termasuk pengkomersialan produk R&D, *project/contact financing* dan *venture financing*.

Malaysia Venture Capital Management Berhad (MAVCAP) menawarkan pembiayaan dalam bentuk pegangan ekuiti kepada syarikat teknologi di peringkat *seed*, *growth* dan *expansion*. Bidang yang diberikan fokus adalah ICT dan industri *high growth*. MDV berkerjasama dengan syarikat modal teroka (venture capital) yang lain seperti *Superseed*, *500 Durians*, *Teak Capital*, *QuestMark*, *Elixir Capital*, *Intres Capital* dan *Gobi* untuk menawarkan pegangan ekuiti kepada syarikat yang berminat.

Kumpulan Modal Perdana (KMP) menawarkan *start-up* dan SME pegangan ekuiti sehingga RM10juta untuk membiayai aktiviti *expansion* dan *scale-up* produk teknologi. Bidang fokus adalah meliputi elektrik dan elektronik, tenaga boleh diperbaharui dan teknologi hijau.

Cradle Fund menawarkan pembiayaan dalam bentuk geran dan pegangan ekuiti sehingga USD1juta kepada *start-up* melalui skim CIP300, DEQ800 dan *Cradle Seed Ventures*. Bidang fokus adalah ICT dan bukan ICT, serta industri *high growth*.

GreenTech Malaysia menawarkan syarikat pembiayaan dalam bentuk *soft loan* pada kadar keuntungan yang kompetitif melalui *Green Technology Financing Scheme* (GTFS). Skop pembiayaan meliputi pembuatan produk teknologi hijau, projek *energy efficient* dan *energy performance contract*.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL PERTAMA,  
PARLIMEN KE EMPATBELAS**

---

**PERTANYAAN : JAWAB LISAN**

**DARIPADA : YB TUAN CHAN FOONG HIN (KOTA  
KINABALU)**

**TARIKH : 11 DISEMBER 2018**

**SOALAN : 26**

**Tuan Chan Foong Hin [ Kota Kinabalu ] minta MENTERI DALAM  
NEGERI menyatakan usaha-usaha kerajaan dalam menangani masalah  
perjudian haram yang berleluasa yang akibatnya akan menjejaskan  
kutipan cukai Kerajaan.**

**JAWAPAN**

Tuan Yang Di-pertua,

Polis Diraja Malaysia (PDRM) sentiasa mengambil pendekatan baru untuk mengekang kegiatan perjudian haram dalam negara. Antara inisiatif baru yang diambil adalah dengan membuka bilik gerakan serta talian khas yang beroperasi 24 jam sehari di seluruh negara bermula 20 Julai 2018 bagi memudahkan orang awam menyalurkan maklumat kepada pihak PDRM. Semua Ketua Polis Negeri dan Ketua Polis Daerah telah diarahkan untuk membuat penilaian dan mengambil tindakan setiap aduan awam yang diterima dalam usaha memerangi aktiviti perjudian ini.

Selain itu, bagi memastikan aktiviti perjudian ini tidak lagi beroperasi dalam daerah-daerah berkenaan, Ketua Polis Daerah, Ketua Polis Balai dan pegawai-pegawai dari Bahagian Jenayah Daerah akan dipertanggungjawab sepenuhnya dan tindakan yang tegas akan diambil untuk ditukarkan daripada daerah berkenaan secara serta merta dan tindakan tatatertib juga akan diambil jika siasatan yang dibuat oleh Jabatan Integriti dan Pematuhan Standard (JIPS) mendapati pegawai polis terlibat atau melindungi sindiket perjudian. Hasil inisiatif yang diambil ini, telah menunjukkan impak yang positif yang mana aktiviti perjudian telah menunjukkan trend penurunan yang mana sindiket tidak lagi berani untuk membuka semula premis setelah diserbu. Di samping itu juga PDRM sentiasa membuat risikan untuk mengesan “modus operandi” baru yang mungkin akan digunakan oleh sindiket untuk menjalankan aktiviti perjudian haram ini.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPATBELAS**

---

**PERTANYAAN : JAWAB LISAN**

**DARIPADA : DATO' SERI MAHDZIR BIN KHALID  
[ PADANG TERAP ]**

**TARIKH : 11 DISEMBER 2018**

**SOALAN : 27**

**Dato' Seri Mahdzir bin Khalid [ Padang Terap ] minta MENTERI DALAM NEGERI** menyatakan sekiranya Akta Kesalahan Keselamatan (Langkah-langkah Khas) 2012 (SOSMA) dimansuhkan apakah mekanisme perundangan sedia ada untuk digunakan sebagai punca kuasa pihak polis bagi mencegah aktiviti kumpulan jenayah terancang yang berupaya memberikan impak negatif kepada keselamatan awam.

**JAWAPAN**

Tuan Yang Di Pertua,

Kerajaan sedang mengkaji semua undang-undang berkaitan keselamatan termasuklah Akta Kesalahan Keselamatan (Langkah-Langkah Khas) 2012 (SOSMA). Dalam hal ini, satu Jawatankuasa Khas yang dianggotai oleh pihak-pihak yang berkaitan seperti Polis Diraja Malaysia (PDRM), Jabatan Peguam Negara (AGC), Badan Peguam Malaysia, Suruhanjaya Hak Asasi Manusia (SUHAKAM) dan badan bukan kerajaan (NGO) telah ditubuhkan untuk menilai dan memperhalus setiap peruntukan dalam undang-undang berkenaan dengan terperinci.

Memandangkan kajian tersebut masih sedang dijalankan, Kerajaan belum memutuskan sama ada undang-undang tersebut perlu dipinda atau dimansuhkan atau undang-undang yang baru perlu diwujudkan.

Kerajaan memberi jaminan bahawa pindaan atau pemansuhan terhadap undang-undang berkenaan tidak akan menjejaskan usaha kerajaan dalam memelihara keselamatan negara daripada pelbagai ancaman termasuklah ancaman daripada kumpulan pengganas dan jenayah.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL PERTAMA,  
PARLIMEN KE EMPATBELAS**

---

**PERTANYAAN : JAWAB LISAN**

**DARIPADA : YB DATO' HJ CHE ABDULLAH B. MAT NAWI  
(TUMPAT)**

**TARIKH : 11 DISEMBER 2018**

**SOALAN : 28**

**YB Dato' Hj Che Abdullah B. Mat Nawi (Tumpat) minta MENTERI  
DALAM NEGERI** menyatakan langkah-langkah yang diambil bagi  
mempertingkatkan keselamatan di sempadan-sempadan negara kursusnya  
sempadan Malaysia-Thailand.

**JAWAPAN**

Tuan Yang Di-Pertua,

Pembentukan dasar dan polisi berkaitan pemantapan kawalan sempadan negara adalah inisiatif yang diambil oleh Kementerian Dalam Negeri bagi meningkatkan lagi kawalan keselamatan di sempadan darat Negara. Antara dasar terbaharu Kerajaan ialah penubuhan Agensi Kawalan Sempadan Malaysia (AKSEM) yang terdiri dari gabungan pelbagai agensi penguatkuasaan seperti Polis Diraja Malaysia (PDRM), Jabatan Kastam Diraja Malaysia (JKDM), Jabatan Imigresen Malaysia (JIM), Agensi Anti Dadah Kebangsaan (AADK), dan Lembaga Kenaf dan Tembakau Negara (LKTN) di bawah satu pasukan petugas dilihat dapat mengambil tindakan yang lebih berkesan, holistik dan bersepadu dalam membendung jenayah rentas sempadan di sempadan Malaysia – Thailand.

Di dalam konteks kawalan sempadan, isu-isu yang sering diperkatakan ialah penyeludupan barang-barang, permerdagangan manusia, jenayah rentas sempadan dan pelanggaran undang-undang negara. Tumpuan AKSEM di konteks kawalan di sempadan adalah seperti berikut:

BIL	RUJUKAN	BARANGAN
1	<b>Barang Kawalan</b>	Gula, Ayam (Segar/Dibekukan), Tepung Gandum, Beras Dari Semua Jenis , Minyak Masak / Minyak Tanah, Padi, Petrol / Diesel, Baja / Racun Serangga, Gas Petroleum Cecair, Kayu
2	<b>Barang Bercukai</b>	Pakaian, Minuman Keras, Rokok, Kenderaan, Barangan Runcit, Buah-buahan / Sayur-sayuran

<b>BIL</b>	<b>RUJUKAN</b>	<b>BARANGAN</b>
3	<b>Barangan Larangan</b>	Dadah, Senjata Api, Mercun, Penerbitan Filem
4	<b>Kesalahan Imigresen</b>	Pendatang Asing tanpa Izin
5	<b>Lain-lain</b>	Kosmetik, Cetakan, Haiwan Hidup, Serbuk Minuman / Makanan

Sehingga 30 September 2018, jumlah nilai anggaran rampasan adalah sebanyak RM 29.8 juta manakala nilai anggaran rampasan bagi tahun 2015 hingga tahun 2017 adalah seperti berikut:

**STATISTIK RAMPASAN TAHUN 2015 – 2017**

<b>BIL</b>	<b>PERKARA</b>	<b>2015 (RM)</b>	<b>2016 (RM)</b>	<b>2017 (RM)</b>
1	Barang Kawalan	1,400,475.05	3,158,924.90	2,149,322.00
2	Barang Bercukai	38,441,319.72	24,511,278.38	27,577,040.74
3	Barangan Larangan	2,327,708.50	8,137,109.58	3,193,032.00
4	Lain-lain Kes	567,273.00	2,822,523.00	1,722,267.14
5	Saman	36,400.00	86,500.00	34,000.00
<b>JUMLAH BESAR</b>		<b>42,773,176.27</b>	<b>38,716,335.86</b>	<b>34,675,661.88</b>



Manakala jumlah PATI yang ditahan sehingga Oktober 2018 adalah seramai 959 orang manakala jumlah PATI ditahan dari tahun 2015 hingga 2017 adalah seperti berikut:

**STATISTIK TANGKAPAN PATI TAHUN 2015 – 2017**

<b>BIL</b>	<b>PERKARA</b>	<b>2015 (RM)</b>	<b>2016 (RM)</b>	<b>2017 (RM)</b>
1	PATI	888	578	650

Beberapa tindakan telah dan sedang diambil oleh KDN terutama AKSEM bagi mempertingkatkan kawalan di sempadan negara terutama di sempadan Malaysia Thailand iaitu:

**1. Jangka Pendek**

- a. Engagement membina database & profiling syarikat *forwarder* berkaitan data lori/*bound truck* bersama JPJ dan KPDNHEP;
- b. Engagement PGA & ATM berkaitan pelaksanaan kawalan di sepanjang sempadan Malaysia – Thailand;
- c. Engagement JKDM berkaitan isu ‘concealed prohibited goods’ di ICQs;
- d. Engagement MAQIS dan Jabatan Veterinar berkaitan penyeludupan binatang ternakan;
- e. Engagement PDRM & JPJ berkaitan kawalan kenderaan daripada negara jiran dan isu tonto;
- f. Engagement BERNAS dan Kawalselia Padi & Beras berkaitan penyeludupan beras; dan

- g. Engagement Jabatan Kesihatan & Penguatkuasa Farmasi berkaitan penyeludupan produk perubatan, minuman & kosmetik.

## **2. Jangka Sederhana**

- a. Membuat penelitian bersama terhadap SOP kawalan dan penguatkuasaan yang digunapakai oleh semua agensi di sempadan;
- b. Engagement dengan semua Jabatan berkaitan kewujudan *loophole* peraturan/Akta yang memberi ruang kesalahan di sempadan dan aktiviti penyeludupan;
- c. Penambahbaikan Dasar Kawalan Sempadan Negara dengan kerjasama pelbagai pihak yang berkepentingan; dan
- d. Cadangan pelaksanaan penguatkuasaan secara bersepadu bagi mengawal pintu masuk negara.

## **3. Jangka Panjang**

- a. Pembinaan SOP Tunggal kawalan sempadan darat Malaysia;
- b. Pembinaan organisasi & pasukan yang kompeten selaras dengan keperluan semasa;
- c. Penambahbaikan perolehan aset dan logistik bagi menangani cabaran dan isu-isu di sempadan darat negara; dan
- d. Peluasan tanggungjawab ke Sabah dan Sarawak selaras dengan Akta 799.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK WIRA HAJAH MAS ERMIEYATI  
BINTI SAMSUDIN [ MASJID TANAH ]**

**TARIKH : 11 DISEMBER 2018 (SELASA)**

**SOALAN NO. 29**

minta **MENTERI PENDIDIKAN** menyatakan nisbah pelajar tingkatan 5 aliran Sains dan bukan aliran Sains sebanyak 60:40 menjelang tahun 2020 yang disasarkan oleh Kerajaan sebelum ini, mampu direalisasikan.

**JAWAPAN**

Yang di-Pertua,

Kementerian Pendidikan Malaysia (KPM) melaksanakan pelbagai program dan inisiatif bagi meningkatkan penyertaan murid dalam aliran sains, teknologi, kejuruteraan dan matematik (STEM) bagi mencapai dasar 60:40. Inisiatif STEM dilaksanakan dengan matlamat melahirkan murid berliterasi STEM, iaitu yang berupaya mengenal pasti, mengaplikasi serta mengintegrasikan konsep STEM. Murid juga berupaya untuk memahami masalah dan menyelesaikannya secara kreatif dan inovatif melalui pembelajaran bersepadu STEM yang mengaplikasikan konteks dunia sebenar, menggunakan pendekatan *hands-on* serta penerokaan baharu dan terbuka.

Pemantapan program STEM merangkumi empat (4) bidang fokus iaitu peningkatan kompetensi guru, peningkatan minat dan kecenderungan murid, peningkatan kesedaran pihak pentadbir sekolah, peningkatan kesedaran pihak ibu bapa dan komuniti. Inisiatif STEM dipantau dari segi kemajuan dan prestasinya bagi memastikan inisiatif berkenaan berjalan dengan baik dan berkesan.

Pelaksanaan Kurikulum Sekolah Standard Sekolah Menengah (KSSM) telah ditambah baik dengan penawaran pelbagai mata pelajaran elektif Sains, Teknologi, Kejuruteraan dan Matematik. Selain dari mata pelajaran-mata pelajaran bidang sains dan matematik seperti Fizik, Kimia, Biologi mahupun Matematik Tambahan, terdapat mata pelajaran berasaskan bidang STEM yang turut ditawarkan seperti Asas Kelestarian, Lukisan Kejuruteraan, Reka Cipta, Pengajian Kejuruteraan Elektrik dan Elektronik dan sebagainya. Mata pelajaran ini bukan hanya ditawarkan di Sekolah Menengah Kebangsaan (SMK), Sekolah Menengah Kebangsaan Agama (SMKA) atau Sekolah Berasrama Penuh (SBP) malah di Sekolah Menengah Teknik dan Kolej Vokasional.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : TUAN CHOW KON YEOW**  
**[ TANJONG ]**  
**TARIKH : 11 DISEMBER 2018 (SELASA)**

**SOALAN NO. 30**

Minta **MENTERI KESIHATAN** menyatakan tentang jumlah dan nilai projek-projek pembesaran Hospital Besar Pulau Pinang, Bukit Mertajam, Seberang Jaya dan Balik Pulau serta klinik-klinik kesihatan di Pulau Pinang. Adakah projek-projek tersebut telah diluluskan dan bila ia akan dilaksanakan.

**JAWAPAN**

**Yang di-Pertua,**

Di bawah RMK 11, bagi **Hospital Pulau Pinang (HPP)**, terdapat satu (1) projek naik taraf sedang dilaksanakan dengan kos RM15.438 juta dan terdapat empat buah lagi projek yang sedang dirancang iaitu Menaiktaraf Perkhidmatan Transplan HPP (RM16.15 juta), Blok Wanita dan Kanak-kanak HPP (RM296.9 juta), Blok Klinik Pakar dan Wad Hospital HPP (RM500 juta) dan Kuarters HPP (RM75 juta).

Bagi **Hospital Seberang Jaya (HSJ)**, terdapat dua (2) buah projek pembangunan yang sedang berjalan iaitu Projek Naiktaraf HSJ (RM17.8 juta) dan *Multistorey Block* HSJ (RM486.2 juta). Kementerian ini turut ingin memaklumkan bahawa pembinaan Projek Naiktaraf Jabatan Kecemasan dan Pesakit Luar, **Hospital Balik Pulau** (RM28.9 juta) sedang berjalan. **Hospital Bukit Mertajam** pula akan dilaksanakan projek menaiktaraf sistem penghawa dingin berpusat di dewan bedah dan sistem bekalan elektrik yang melibatkan kos RM7 juta.

Manakala bagi projek pembinaan **klinik kesihatan di Pulau Pinang**, terdapat dua (2) buah projek yang telah diluluskan iaitu Klinik Kesihatan (Jenis 2) Bandar PERDA, Seberang Perai Tengah dan Klinik Kesihatan (Jenis 3) Air Putih, Barat Daya dengan kos RM30 juta. Manakala Klinik Kesihatan (Jenis 2) Bandar PERDA, Seberang Perai Tengah sedang dibina.

**PEMBERITAHUAN PERTANYAAN LISAN DEWAN RAKYAT,  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI REEZAL MERICAN BIN  
NAINA MERICAN [ KEPALA BATAS ]**

**TARIKH : 11 DISEMBER 2018 (KHAMIS)**

**SOALAN NO. 31**

Minta **MENTERI PENDIDIKAN** menyatakan langkah-langkah strategik Kementerian dalam merealisasikan Universiti Islam Antarabangsa Malaysia (UIAM) sebagai 'Oxford of Muslim Nations'. Apakah teras dan tunjang utama kepada usaha ini.

**JAWAPAN**

Tuan Yang di-Pertua,

Kementerian dan Universiti Islam Antarabangsa Malaysia (UIAM) telah mengorak langkah ke arah merealisasikan UIAM sebagai 'Oxford of Muslim Nations', dengan mengambil kira:

- (a) Penyelidikan dan inovasi yang relevan melalui kajian penterjemahan, jalinan kerjasama berpandukan *Model Quintiple Helix* dan pembinaan komuniti yang seimbang dan harmoni melalui kerangka *Knowledge for Change* UNESCO, berpandukan prinsip-prinsip *maqasid syariah* dan pencapaian pembangunan lestari.
- (b) Memperkasa program pendidikan supaya bersifat lebih menyeluruh dan fleksibel yang menggalakkan keterbukaan, peradaban dan percambahan idea merentas bidang, dan ciri-ciri kepimpinan bagi ahli akademik dan pelajar.

- (c) Kurikulum yang dibangun adalah holistik di mana ilmu wahyu dan ilmu ciptaan manusia (*human reasoning*) diintegrasikan demi memastikan graduan adalah insan kamil yang akan menjadi pemimpin yang berintegriti.
- (d) Menyediakan ekosistem penyelidikan, penerbitan dan pendidikan yang mencambahkan aktiviti ilmiah yang berteraskan nilai.
- (e) Menggalakkan keterlibatan alumni, industri dan komuniti untuk tabung wakaf.
- (f) Menawarkan program profesional, kemahiran jangka pendek kepada semua dalam negara dan antarabangsa, program kemasyarakatan serta perkembangan sahsiah yang diuruskan oleh staf dan pelajar. .
- (g) Mempergiatkan proses pengantarabangsaan dengan menambahkan jaringan kolaborasi di kalangan IPT luar negara dan institusi lain yang berkaitan, meningkatkan enrolmen pelajar antarabangsa, menarik tenaga pengajar antarabangsa yang bertaraf dunia (*world class*) dan menggalakkan mobiliti pelajar dengan pemindahan kredit.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KE DUA, PENGGAL PERTAMA,  
PARLIMEN KE EMPATBELAS**

---

**PERTANYAAN : JAWAB LISAN**

**DARIPADA : YB DATO' MOHD KHAIRUDDIN B. AMAN  
RAZALI (KUALA NERUS)**

**TARIKH : 11 DISEMBER 2018**

**SOALAN : 32**

**Dato' Dr. Mohd Khairuddin bin Aman Razali [ Kuala Nerus ] minta  
MENTERI DALAM NEGERI** menyatakan tahap keselamatan perairan  
Terengganu daripada ancaman nelayan asing serta menyatakan usaha  
bagi menangani ancaman tersebut.

**JAWAPAN:**

Tuan Yang Dipertua,

Untuk makluman Ahli Yang Berhormat dan Dewan Yang Mulia ini, dalam menjalankan tugas penguatkuasaan di perairan Terengganu, Agensi Penguatkuasaan Maritim Malaysia (APMM) sentiasa memberi komitmen untuk menyekat bot nelayan asing (BNA) daripada menceroboh perairan tersebut.

Sehingga November 2018, sebanyak 34 bot nelayan asing ditahan di perairan Terengganu. Oleh yang demikian, kejadian bot nelayan asing memasuki perairan Terengganu adalah terkawal.

Usaha membanteras perlakuan jenayah di laut serta pencerobohan BNA di perairan Terengganu terus dilaksanakan oleh APMM melalui langkah-langkah berikut:

- a. Melaksanakan rondaan 24/7 di perairan negara oleh kapal dan bot Maritim Malaysia bagi mengesan kegiatan jenayah maritim dan pencerobohan bot nelayan asing khususnya dari negara Vietnam. APMM memastikan aset sedia ada melaksanakan rondaan di Laut China Selatan termasuk perairan Terengganu bermula dari 30 batu nautika sehingga sempadan Zon Ekonomi Eksklusif (ZEE);
- b. Keupayaan Maritim Malaysia di perairan Terengganu diperkuatkan dengan kehadiran 2 buah kapal ronda *Offshore Patrol Vessel* (OPV) bersaiz besar iaitu KM PEKAN dan KM LANGKAWI yang berupaya beroperasi dengan lebih lama iaitu sehingga 20 hari di laut; dan
- c. Melaksanakan kerjasama dengan komuniti nelayan melalui program Sahabat Maritim di seluruh negara. Dalam konteks ini, nelayan akan berperanan sebagai mata dan telinga kepada Agensi dalam menyalurkan maklumat berkenaan pencerobohan BNA dan lain-lain perlakuan jenayah maritim.

**PEMBERITAHUAN PERTANYAAN JAWAB LISAN DEWAN NEGARA  
MESYUARAT KE DUA, PENGGAL PERTAMA,  
PARLIMEN KE EMPATBELAS**

---

**PERTANYAAN : JAWAB LISAN**

**DARIPADA : YB DATO' NGEH KOO HAM (BERUAS)**

**TARIKH : 11 DISEMBER 2018**

**SOALAN : 33**

**Dato' Ngeh Koo Ham [ Beruas ] minta MENTERI DALAM NEGERI** menyatakan sama ada Kerajaan bersedia menurunkan kuasa ke pejabat-pejabat imigresen negeri dan daerah untuk mengurus permohonan mendapat pekerja asing.

**JAWAPAN**

Tuan Yang Di Pertua,

Untuk makluman Yang Berhormat, semua Pejabat Imigresen Negeri pada masa ini telah dipertanggungjawabkan untuk mengurus permohonan pekerja asing setelah mendapat kelulusan kuota daripada pihak Kementerian Dalam Negeri.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATIN PADUKA DR. TAN YEE KEW  
[ WANGSA MAJU]**

**TARIKH : 11 DISEMBER 2018 [ SELASA ]**

**SOALAN NO. 34**

Minta **MENTERI PERUMAHAN DAN KERAJAAN TEMPATAN** menyatakan:-

- a) berapakah jumlah golongan miskin tegar di kawasan Parlimen Wangsa Maju; dan
- b) apakah tindakan khusus yang telah atau akan dilaksanakan untuk menangani permasalahan ini serta berapakah peruntukan kewangan yang telah diagihkan untuk tujuan tersebut.

**JAWAPAN**

Tuan Yang di-Pertua,

- a) Untuk makluman Ahli Yang Berhormat, jumlah **miskin tegar** di kawasan Parlimen Wangsa Maju adalah seramai **62 orang**.
- b) Untuk makluman ahli Yang Berhormat juga, bagi menangani isu kemiskinan di bandar, Kementerian Perumahan dan Kerajaan Tempatan (KPKT) telah melaksanakan **Program AZAM Bandar, Program Kios Penjaja Bandar** dan **Program Titipan Kasih (Food Basket)** yang tidak hanya tertumpu di kawasan Wangsa Maju malah meliputi seluruh Malaysia. Ketiga-tiga program ini adalah bertujuan untuk meningkatkan pendapatan serta sebagai bantuan untuk mengurangkan bebanan kewangan keluarga. Maklumat program tersebut adalah seperti berikut:
  - (i) **Program AZAM Bandar** bertujuan melatih kumpulan sasaran untuk meningkatkan kemahiran dan mengusahakan perniagaan. Setiap individu menerima bantuan bernilai sehingga RM10,000.00 yang merangkumi bantuan latihan, alat kelengkapan perniagaan dan proses pemantauan mengikut jenis perniagaan yang dipilih;
  - (ii) **Program Kios Penjaja Bandar** yang bermatlamat untuk membantu golongan B40 mendapatkan Kios Penjaja yang selamat dan selesa bagi membolehkan mereka menjalankan perniagaan secara kecil-kecilan seterusnya menjana pendapatan dan meningkatkan kualiti hidup. Setiap individu menerima bantuan bernilai sehingga RM15,000.00 yang merangkumi bantuan latihan dan juga kios berserta alat kelengkapan mengikut jenis perniagaan yang dipilih; dan

- (iii) **Program Titipan Kasih (*Food Basket*)** yang memberi tumpuan kepada keluarga miskin tegar untuk membeli barangan keperluan asas (dengan jumlah RM80.00 sebulan bagi setiap Ketua Isi Rumah) seperti beras, minyak masak, gula, garam dan sebagainya bagi mengurangkan bebanan kewangan keluarga.

Statistik penerima bantuan dan jumlah peruntukan yang diagihkan untuk kawasan Parlimen Wangsa Maju sejak tahun 2015 hingga 2017 adalah seperti berikut:

Program	2015		2016		2017	
	Penerima	Peruntukan (RM)	Penerima	Peruntukan (RM)	Penerima	Peruntukan (RM)
AZAM Bandar	30	300,000.00	9	90,000.00	0	0.00
Kios Penjaja Bandar	Tiada Permohonan					
Titipan Kasih ( <i>Food Basket</i> )	0	0.00	1	960.00	1	960.00
<b>Jumlah</b>	<b>30</b>	<b>300,000.00</b>	<b>11</b>	<b>100,960.00</b>	<b>1</b>	<b>960.00</b>

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : Lisan**

**DARIPADA : Tuan Abdul Latiff bin Abdul Rahman  
[ Kuala Krai ]**

**TARIKH : 11 Disember 2018 (Selasa)**

**SOALAN 35**

**Tuan Abdul Latiff bin Abdul Rahman [ Kuala Krai ] minta  
MENTERI PERTANIAN DAN INDUSTRI ASAS TANI** menyatakan  
adakah Kementerian bercadang menjadikan Kuala Krai sebagai  
kawasan penanaman Durian Kunyit utama di Malaysia dan  
apakah langkah-langkah yang diambil oleh pihak Kementerian  
untuk membantu pengusaha Durian Kunyit tersebut.

**JAWAPAN**

**Tuan Yang Dipertua,**

Jumlah keseluruhan kawasan penanaman durian di daerah Kuala Krai adalah seluas 1,215 hektar yang mana daripada jumlah ini hanya seluas 170 hektar sahaja ditanam dengan durian kunyit berbanding jenis-jenis durian lain. Selain itu, keluasan tersebut juga adalah lebih kecil berbanding kawasan utama durian lain seperti Raub (Pahang), Muar (Johor) dan Batu Kurau (Perak).

Justeru itu, Kementerian belum bercadang untuk membangunkan daerah Kuala Krai sebagai kawasan penanaman durian kunyit utama walaupun terdapat potensi pembangunan durian kunyit di daerah tersebut tertakluk kepada kesediaan dan kesesuaian kawasan.

Langkah-langkah yang boleh diambil oleh Kementerian untuk membantu pengusaha durian kunyit di kawasan tersebut adalah seperti berikut:

- i. Meneruskan pembangunan projek tanaman durian di bawah Rancangan Malaysia Ke-11 melalui Projek Pembangunan Kluster Durian, Projek Tanam Semula Buah-buahan Terpilih dan Program Sumber Rezeki Baharu Durian yang bertujuan meningkatkan pengeluaran dan kualiti hasil ladang;
- ii. Memperkasakan program latihan kepada petani dengan mengadakan kursus dan latihan *hands on* bagi meningkatkan ilmu pengusaha mengenai pengurusan amalan pertanian baik durian supaya produktiviti ladang dapat dipertingkatkan ke arah memperoleh pensijilan kualiti seperti myGAP; dan
- iii. Menggalakkan pekebun durian melibatkan diri dalam penghasilan produk hasilan durian seperti jem, aiskrim, coklat, kopi dan kek bagi menambah pendapatan mereka.



**PEMBERITAHUAN PERTANYAAN JAWAB LISAN DEWAN NEGARA  
MESYUARAT KE DUA, PENGAL PERTAMA,  
PARLIMEN KE EMPATBELAS**

---

**PERTANYAAN : JAWAB LISAN**

**DARIPADA : YB TUAN AKMAL NASRULLAH B. MOHD NASIR  
(JOHOR BAHRU)**

**TARIKH : 11 DISEMBER 2018**

**SOALAN : 36**

**Tuan Akmal Nasrullah bin Mohd. Nasir [ Johor Bahru ] minta MENTERI  
DALAM NEGERI** menyatakan langkah-langkah mengurangkan Pendatang  
Asing Tanpa Izin (PATI) dan sasaran jumlah pengurangan PATI dalam  
tempoh 5 tahun

**JAWAPAN**

Tuan Yang Di Pertua,

Untuk makluman Yang Berhormat, Kerajaan telah melaksanakan pelbagai  
langkah-langkah bagi mengekang pertumbuhan jumlah Pendatang Asing  
Tanpa Izin (PATI) di dalam Negara. Antara lainnya adalah dengan  
mengadakan operasi penguatkuasaan dari semasa ke semasa, Program  
Penghantaran Pulang PATI Secara Sukarela (Program 3 + 1) yang berakhir  
pada 30 Ogos 2018 dan tindakan undang-undang ke atas majikan yang  
dikesan menggaji PATI di bawah Akta Imigresen 1959/63.

Selain itu, sebagai langkah mengesan PATI, mengenal pasti lokaliti dan  
pekerjaan PATI di dalam Negara, Kerajaan telah melaksanakan  
pemeriksaan dan risikan berdasarkan aduan yang diterima daripada orang  
awam dari pelbagai sumber seperti e-mel, surat, telefon, sistem pesanan  
ringkas dan aduan melalui kaunter imigresen termasuk isu-isu yang  
berkaitan PATI yang tular di media sosial. Ibu Pejabat dan Pejabat

## SOALAN NO : 36

Imigresen Negeri yang menerima sebarang aduan akan menjalankan operasi penguatkuasaan dengan mengambil kira aspek perancangan, faktor risiko dan pematuhan kepada *Standard Operating Procedures* (SOP) seperti yang telah ditetapkan.

Kerajaan juga telah melaksanakan beberapa langkah pencegahan dan kawalan seperti berikut:

- a) Memperketat kawalan dan pemeriksaan di pintu-pintu masuk negara;
- b) Mempertingkatkan pengawasan di sepanjang pesisiran perairan negara, iaitu kawasan-kawasan yang telah dikenal pasti sebagai tempat pendaratan dan kemasukan PATI;
- c) Memperkasa usaha-usaha risikan, pemantauan dan penguatkuasaan bagi menyekat penyeludupan manusia di sempadan darat negara;
- d) Memperketat syarat pengeluaran visa kepada warganegara asing yang memerlukan visa untuk masuk dan berada di Malaysia. memperkenalkan reka bentuk *Malaysia Visa* dan *Malaysia Pass* pada 2 Oktober 2018 dengan ciri-ciri keselamatan yang terkini dan komprehensif bagi menangani isu penyalahgunaan dan pemalsuan dokumen;
- e) Membuat naziran ke premis-premis yang terdapat warganegara asing, seperti kawasan luar bandar, kawasan bandar dan premis majikan yang menggaji pekerja asing serta institusi pengajian yang mengambil pelajar antarabangsa serta warga asing yang menjadi pasangan warganegara (perkahwinan antara warga asing dengan warga tempatan).

Kerajaan tidak mempunyai sasaran jumlah pengurangan PATI memandangkan tiada maklumat berhubung statistik mutlak jumlah PATI di negara ini. Walau bagaimanapun, Kerajaan sentiasa komited dalam memastikan keselamatan negara diutamakan dengan melaksanakan operasi penguatkuasaan bersepadu secara berterusan serta tindakan pencegahan bagi mengelakkan berlakunya peningkatan daripada segi jumlah PATI di negara ini.

**MESYUARAT KEDUA, PENGGAL PERTAMA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : DATO' HAJI MOHD FASIAH BIN HAJI  
MOHD FAKEH  
[ SABAK BERNAM ]**

**TARIKH : 11 DISEMBER 2018 (SELASA)**

**SOALAN : 37**

minta **MENTERI PEMBANGUNAN LUAR BANDAR** menyatakan setakat manakah Kementerian telah menyediakan pusat aktiviti komuniti seperti balai raya dan dewan orang ramai dan nyatakan apakah langkah Kementerian untuk membaik pulih pusat kegiatan komuniti berkenaan seperti di Selangor khususnya di Parlimen Sabak Bernam.

**JAWAPAN:**

Tuan Yang Di-Pertua,

Untuk makluman Yang Berhormat, Program Ameniti Sosial (PAMS) memberi tumpuan kepada beberapa jenis projek yang terpilih dan dikenalpasti menjadi keperluan utama serta mustahak untuk dibangunkan di dalam sesebuah kampung. Di bawah kategori Kemudahan Desa dan Pendidikan, projek pembinaan baru serta membaikpulih balai raya dan dewan orang ramai merupakan komponen projek yang menjadi tumpuan utama pihak kementerian untuk dilaksanakan.

Pihak kementerian berpandangan bahawa lokasi-lokasi ini menjadi tempat untuk meningkatkan elemen perpaduan, sifat muafakat dan semangat toleransi di kalangan masyarakat desa melalui penyediaan dan penggunaan secara aktif kemudahan-kemudahan sosial yang disediakan.

Oleh yang demikian, pihak kementerian telah menjadikan pembinaan baru serta menaiktaraf balai raya dan dewan orang ramai sebagai antara elemen utama dalam program ini di samping kemudahan-kemudahan yang lain seperti pembinaan jambatan kecil, padang permainan kanak-kanak dan surau.

Bagi tahun 2017 dan 2018, sejumlah 22 projek bernilai RM 1.23 juta yang melibatkan kerja-kerja membina baru serta membaikpulih balai raya serta dewan orang ramai telah dilaksanakan di Negeri Selangor dan terdapat satu projek telah dilaksanakan di Parlimen Sabak Bernam.

Pihak kementerian akan terus mengenalpasti balai -balai raya serta dewan-dewan orang ramai yang uzur dan memerlukan kerja-kerja baikpulih bagi membolehkan ianya terus digunakan oleh penduduk setempat. Yang Berhormat juga boleh mengemukakan permohonan mengikut keutamaan. Sekiranya menepati skop dan terdapat keperluan mendesak, permohonan tersebut akan diberi pertimbangan sewajarnya tertakluk kepada siling peruntukan yang diluluskan kepada setiap negeri.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : Lisan**

**DARIPADA : Tuan Mordi Bimol [ Mas Gading ]**

**TARIKH : 11 Disember 2018 (Selasa)**

**SOALAN 38**

**Tuan Mordi Bimol [ Mas Gading ]** minta **PERDANA MENTERI** menyatakan jumlah peruntukan yang telah disalurkan untuk projek Nanas MD2 di Sarawak khasnya di Mas Gading dan apakah rancangan seterusnya seperti pembinaan kilang serta pusat pengumpulan benih atau buah bagi memastikan projek tersebut berjaya dan menjadi salah satu tanaman penting di Mas Gading.

**JAWAPAN**

**Tuan Yang Dipertua,**

Kementerian Pertanian dan Industri Asas Tani melalui agensi Lembaga Perindustrian Nanas Malaysia telah menyalurkan sejumlah RM 2.3 juta untuk pembangunan nanas MD2 di Sarawak dari tahun 2016. Bagi kawasan Mas Gading, sejumlah RM 1.3 juta telah disalurkan pada tahun 2016 dan 2017 melalui Projek Rintis Kajian Pembangunan Nanas MD2 di Padang Pan, Bau, Sarawak yang melibatkan kawasan tanaman seluas 100 ekar. Projek Rintis ini dijangka akan mula mengeluarkan hasil pada Disember 2018 dan Januari 2019.

Manakala bagi tahun 2018 sejumlah RM 1.0 juta telah diperuntukkan kepada negeri Sarawak untuk pembangunan nanas MD2 yang merangkumi keseluruhan Bahagian dan Daerah di Negeri Sarawak termasuk di kawasan Parlimen Mas Gading.

Selain itu, di bawah RMKe-11 bagi tahun 2018 LPNM juga telah menyalurkan peruntukan sejumlah RM 3.0 juta untuk pembangunan tanaman nanas vareiti tempatan selain nanas MD2 di Sarawak.

Pada masa ini, keperluan utama Kementerian adalah untuk memastikan pembangunan kawasan tanaman nanas dapat diperluaskan dan manfaat ekonomi penduduk tempatan dapat dipertingkatkan. Pihak kementerian juga akan menilai keperluan pengusaha nanas di Sarawak dari semasa ke semasa terutama di kawasan Parlimen Mas Gading termasuk keperluan-keperluan pembinaan kilang pemprosesan nanas serta pembinaan pusat pengumpulan benih dan buah untuk aktiviti pemasaran pengusaha tempatan.

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : DATO' TAKIYUDDIN BIN HASSAN  
[KOTA BHARU]**

**TARIKH : 11 DISEMBER 2018**

**SOALAN : 39**

**DATO' TAKIYUDDIN BIN HASSAN [KOTA BHARU] minta PERDANA  
MENTERI menyatakan:**

- (a) bilakah Kerajaan akan meminda undang-undang dan Perlembagaan Persekutuan bagi menurunkan had umur minima layak mengundi dalam pilihan raya negara ini; dan
- (b) adakah Kerajaan bercadang membenarkan pelajar universiti di negara ini bebas terlibat dalam politik kepartian.

**JAWAPAN: YB TUAN MOHAMED HANIPA BIN MAIDIN**  
**TIMBALAN MENTERI DI JABATAN PERDANA**  
**MENTERI**

Tuan Yang Dipertua,

- (a) Seperti mana Ahli Yang Berhormat sedia maklum, Kerajaan secara prinsipnya telah meluluskan cadangan untuk menurunkan umur layak mendaftar sebagai pemilih dari umur 21 tahun kepada 18 tahun. Selaras dengan keputusan tersebut, Suruhanjaya Pilihan Raya sedang **mengadakan kerjasama dengan Kementerian Belia dan Sukan, Jabatan Peguam Negara dan Jawatankuasa Pembaikan Sistem dan Undang-Undang Pilihan Raya Malaysia (*Electoral Reform Committee* - ERC)** untuk meneliti pindaan undang-undang yang terlibat termasuk pindaan kepada undang-undang sedia ada.

Berhubung perkara tersebut, keputusan Jemaah Menteri pada **19 September 2018** bersetuju supaya pindaan-pindaan berkaitan reformasi sistem pilihan raya termasuklah cadangan untuk menurunkan umur layak mendaftar sebagai pemilih dari umur 21 tahun kepada 18 tahun dibentangkan secara bersekali dengan pindaan-pindaan yang lain mengambil kira tempoh kajian yang sedang dilaksanakan oleh ERC iaitu selama 2 tahun.



- (b) Untuk makluman Ahli Yang Berhormat, Kementerian Pendidikan Malaysia telah **membatalkan peruntukan yang menghalang pelajar terlibat dalam aktiviti parti politik di dalam kampus (Seksyen 15(2)(c) Akta Universiti Dan Kolej Universiti 1971 [Akta 30]) yang telah dibentangkan dan diluluskan di Dewan Rakyat pada 10 Disember 2018 dan dijangka akan dibentangkan di Dewan Negara pada 19 Disember 2018.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' HAJI JALALUDDIN BIN HAJI  
ALIAS  
[ JELEBU ]**

**TARIKH : 11 DISEMBER 2018 (SELASA)**

**SOALAN NO. 40**

Minta **MENTERI HAL EHWAL EKONOMI** menyatakan apakah perancangan Kementerian dalam menghapuskan hutang para peneroka FELDA dan bilakah perancangan ini akan dilaksanakan.

**JAWAPAN**

Yang di-Pertua,

Untuk makluman Ahli Yang Berhormat, Kerajaan sentiasa komited dalam membela nasib peneroka FELDA dan keluarga mereka. Kerajaan pada hari ini mendapati FELDA sedang menghadapi masalah aliran tunai yang amat kritikal. Selaras iltizam untuk memulihkan FELDA, langkah pertama diambil Kerajaan adalah pelantikan Pengerusi dan Ahli Lembaga FELDA baharu yang telah dilaksanakan pada Julai 2018.

Justeru, tumpuan segera Lembaga Pengarah dan Pengurusan FELDA yang baharu adalah untuk memulihkan kedudukan aliran tunai FELDA melalui perbincangan dengan pemiutang (*creditors*) untuk menstrukturkan semula pinjaman FELDA yang sudah mencecah jumlah keseluruhan RM8.025 bilion.

Langkah seterusnya yang sedang diambil untuk memperkukuhkan kedudukan aliran tunai adalah melalui penjualan aset-aset yang tidak strategik seperti hartanah di luar dan dalam negara. Pulangan daripada penjualan berkenaan akan dipastikan mendapat nilai yang terbaik dan boleh dimanfaatkan bagi tujuan operasi, seterusnya kepada kesejahteraan peneroka.

Kedudukan kewangan FELDA yang kritikal pada hari ini adalah legasi kepimpinan terdahulu yang lemah dalam tadbir urus korporat dan pengurusan kewangan yang tidak bertanggungjawab. Kerajaan baru komited untuk memulihkan FELDA secepat mungkin demi kesejahteraan peneroka-peneroka selaras dengan matlamat penubuhan FELDA di bawah Akta Kemajuan Tanah 1956. Fokus utama Lembaga Pengarah dan juga Pengurusan FELDA yang baharu adalah untuk melaksanakan tanggungjawab perundangan (*statutory obligation*) terhadap peneroka-peneroka FELDA.

Kerajaan yakin Lembaga Pengarah dan Pengurusan FELDA yang baharu akan berpegang kepada prinsip kebertanggungjawaban dan tadbir urus yang tinggi demi menjayakan proses pemulihan FELDA dan pembangunan FELDA yang mampan. Untuk maksud ini Kerajaan telahpun memutuskan untuk membentangkan Kertas Putih (*White Paper*) di dalam Parlimen pada sidang akan datang bagi mendedahkan situasi sebenar yang dihadapi FELDA dan juga perancangan strategik pemulihan agensi tersebut.

Lanjutan dari itu, Kerajaan percaya kedudukan sebenar agensi ini dan langkah pemulihannya akan dapat dikenal pasti. Seterusnya ini akan membantu Kerajaan dalam merangka pelan tindakan pemulihan menyeluruh yang bersesuaian dan memberi manfaat langsung kepada para peneroka.

Sekian, terima kasih.

11 Disember 2018

Kementerian Hal Ehwal EKonomi

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK WILSON UGAK ANAK KUMBONG  
[ HULU RAJANG ]**

**TARIKH : 11 DISEMBER 2018 (SELASA)**

**SOALAN NO. 41**

minta **MENTERI PENDIDIKAN** menyatakan berapakah bilangan sekolah-sekolah daif di kawasan Parlimen Hulu Rajang.

**JAWAPAN**

Yang di-Pertua,

Untuk makluman Ahli Yang Berhormat, terdapat sebanyak 116 projek sekolah daif dilaksanakan di Sarawak termasuk 38 buah sekolah daif di kawasan Parlimen Hulu Rajang. Pada masa ini, bagi negeri Sarawak sebanyak 64 projek telah siap manakala baki sebanyak 52 projek sedang dalam pelaksanaan.

Kementerian Pendidikan Malaysia (KPM) juga menyediakan Peruntukan Khas Pembaikan dan Penyelenggaraan Sekolah (PPKHAS) tahun 2018 berjumlah RM35.74 juta kepada Jabatan Pendidikan Negeri Sarawak untuk pembaikan dan penyelenggaraan di 832 buah sekolah iaitu di Sekolah Kebangsaan (rendah, menengah dan agama), Sekolah Berasrama Penuh, Sekolah Agama Bantuan Kerajaan, Kolej Vokasional dan Sekolah Menengah Teknik.

Bagi kawasan Parlimen Hulu Rajang, pada tahun ini KPM telah menyalurkan peruntukan sebanyak RM679,775.00 untuk penyelenggaraan dan pembaikan kecil lima (5) buah sekolah kerajaan. Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA,  
PARLIMEN KEEMPAT BELAS**

---

**PERTANYAAN : Lisan**  
**DARIPADA : Dato' Haji Salim Sharif [ Jempol ]**  
**TARIKH : 11 Disember 2018**

**SOALAN 42**

**Dato' Haji Salim Sharif minta MENTERI PERTANIAN DAN INDUSTRI ASAS TANI menyatakan rasional untuk menghentikan insentif tunai secara *one-off* yang diberikan oleh Kerajaan Barisan Nasional kepada nelayan sebelum ini yang bertujuan untuk meringankan beban nelayan.**

**JAWAPAN**

**Tuan Yang Dipertua,**

Untuk makluman Ahli Yang Berhormat, Untuk makluman Ahli Yang Berhormat, Kerajaan akan meneruskan pemberian bantuan elaun sara hidup kepada nelayan berdasarkan peruntukan yang telah diluluskan di dalam Belanjawan 2019. Dalam hal ini, Kementerian melalui LKIM dan DOF telah melaksanakan pemutihan bilangan penerima bantuan elaun sara hidup bermula pada bulan September 2018 selaras dengan keputusan Jemaah Menteri pada 17 Ogos 2018 mengenai cadangan penjimatan, konsolidasi dan rasionalisasi program atau aktiviti Jabatan / Agensi / Kementerian bagi memastikan hanya yang benar-benar layak menerima bantuan ini.

**SOALAN NO. : 43**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN AHMAD FADHLI BIN SHAARI [ PASIR  
MAS ]**

**TARIKH : 11 DISEMBER 2018 (SELASA)**

**SOALAN NO.43**

**Tuan Ahmad Fadhli bin Shaari [ Pasir Mas ]** minta **MENTERI AIR, TANAH  
DAN SUMBER ASLI** menyatakan bilakah projek tebatan banjir yang  
melibatkan jajaran Sungai Golok, Kelantan akan dimulakan dan dijangka  
siap.

## **SOALAN NO.43**

### **JAWAPAN:**

Tuan Yang di-Pertua,

Kerja-kerja pembinaan projek Pembangunan Lembangan Sungai Bersepadu (PLSB) Sungai Golok Fasa 1 telah mula dilaksanakan pada 23 April 2018 dan dijangka siap pada 22 April 2022.

Sekian, terima kasih.



**SOALAN NO. : 44**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' MOHD. NIZAR BIN HAJI ZAKARIA  
[PARIT]**

**TARIKH : 11 DISEMBER 2018 (SELASA)**

**SOALAN NO.44**

**Dato' Mohd. Nizar bin Haji Zakaria [ Parit ]** minta **MENTERI AIR, TANAH  
DAN SUMBER ASLI** menyatakan :-

- (a) sehingga penghujung tahun 2017, berapakah statistik terkini haiwan yang diancam kepupusan ; dan
- (b) apakah usaha yang telah dilaksanakan oleh pihak Kementerian bagi melindungi haiwan liar yang diancam kepupusan

## SOALAN NO.44

### JAWAPAN:

Tuan Yang di-Pertua,

Sehingga penghujung tahun 2017, data yang direkodkan di dalam *Red List of Mammals for Peninsular Malaysia*, terdapat satu spesies yang telah disenaraikan sebagai pupus atau **extinct** iaitu Badak Jawa, manakala empat (4) spesies dinilai sebagai **critically endangered** iaitu Badak Sumatera, Harimau Malaya, Tenggiling dan Banteng. Selain itu, sebanyak 12 spesies dinilai sebagai **endangered** sementara 14 spesies dinilai sebagai **vulnerable**, 33 spesies **near threatened**, 83 spesies **least concern** dan 76 species **data deficient**.

Kerajaan amat komited dalam melindungi hidupan liar yang terancam agar tidak pupus. Antara usaha yang dijalankan ialah:

- (i) Mewujudkan kawasan perlindungan seperti Taman-Taman Negara dan rezab-rezab hidupan liar bagi keliaran hidupan liar di habitat semulajadi;
- (ii) Mewujudkan rangkaian koridor ekologi membentuk satu rangkaian hutan perlindungan yang bersambung bagi membolehkan migrasi hidupan liar.

- (iii) Meminda Akta Pemuliharaan Hidupan Liar 2010 (Akta 716) bagi mengenakan hukuman denda yang lebih berat termasuk hukuman sebatan untuk kesalahan menceroboh kawasan rizab-rizab dan kezaliman terhadap hidupan liar.
- (iv) Menjalankan program penguatkuasaan secara bersama dengan agensi penguatkuasaan tempatan yang lain dan agensi antarabangsa seperti International Police (INTERPOL) bagi memastikan semua hidupan yang terancam dilindungi daripada dieksploitasi secara tidak terkawal, disamping mencegah penyeludupannya.
- (v) Melaksanakan Pelan Tindakan Konservasi Spesies-Spesies Hidupan Liar Terancam seperti Pelan Konservasi Gajah Kebangsaan (NECAP) (2013 – 2022) dan Pelan Tindakan Pemuliharaan Harimau Kebangsaan (NTCAP) (2008-2020) bagi menangani ancaman yang dihadapi oleh gajah dan harimau akibat fragmentasi hutan, kehilangan habitat, pemburuan haram dan pembunuhan hidupan liar oleh orang awam akibat konflik. Sasaran utama Pelan ini adalah untuk mewujudkan keseimbangan antara konservasi hidupan liar tersebut dan aktiviti pembangunan semasa di Semenanjung Malaysia.
- (vi) Menjalankan program konservasi hidupan liar secara ex-situ melalui pembiakan di dalam kurungan untuk menyediakan stok hidupan liar bagi program pelepasan semula ke habitat semulajadi. Antara spesies yang berjaya dibiak dan dilepaskan ke habitat semulajadi adalah seladang, tapir, rusa, kijang dan burung kuang.

- (vii) Bekerjasama dengan Kerajaan-kerajaan Negeri untuk mebangunkan kawasan-kawasan *sanctuary* bagi pengurusan populasi hidupan liar yang diancam kepupusan ekoran kehilangan habitat.
- (viii) Menjalankan program Communication, Education dan Public Awareness (CEPA) secara berterusan

Sekian, terima kasih.

